


2. 7. 192



2. 7. 197

DEUSU  
ET NECESSITATE  
ELOQUENTIÆ  
IN REBUS SACRIS TRACTANDIS.

Differtatio

Habita in Archigymnasio Romanæ  
Sapientiæ

A FR. ALEXANDRO BURGOS  
Siculo Meffanensi

*Ordinis Minorum Conventualium Theologo,  
& publico Eloquentiæ professore.*



ROMÆ MDCCX.  
Excudebat FRANCISCUS GONZAGA in via Lata.  
SUPERIORUM FACULTATE.

THE  
NEW YORK  
LIBRARY  
ASTOR LENOX TILDEN FOUNDATION  
1215 6TH AVENUE  
NEW YORK 17, N.Y.

OLDEN

THE  
NEW YORK  
LIBRARY  
ASTOR LENOX TILDEN FOUNDATION  
1215 6TH AVENUE  
NEW YORK 17, N.Y.

THE  
NEW YORK  
LIBRARY  
ASTOR LENOX TILDEN FOUNDATION  
1215 6TH AVENUE  
NEW YORK 17, N.Y.



# CLEMENTI XI.

## PONTIFICI MAXIMO.

FRATER ALEXANDER BURGOS.



FFICI mei multis de caus-  
fis erat , CLEMENS Pater Sanctissime,  
ut Tibi brevem hanc non tam lauda-  
tionem , quam defensionem veræ soli-  
dæque Eloquentiæ inscriberem ; qua  
qui-



quidem sese adversus quorundam male  
feriatorum calumnias, falsasque opinio-  
nes politiores literæ tuo sub auspicio tue-  
rentur. Unam tamen & alteram nunc te-  
tigisse sit satis: etenim hujus nostræ Dif-  
fertationis, tota quanta est, eo præcipue  
collineat industria, ut & artis splendi-  
dissimæ atque mirabilis, ad concilian-  
dos movendosque animos factæ, & hu-  
maniorum literarum politissima studia,  
e sede sua quorundam sive tarditate  
ingenii, sive animi socordia, aut male-  
volentia deturbata, ad res sacras vete-  
rum Theologorum more pertractandas  
postliminio revocentur. Quod quidem  
& plenius & perfectius me assequi posse  
confido, si quæ a me virilis sanctæque  
Eloquentiæ præcepta doctorum homi-  
num testimonio firmata traduntur, ea  
Tu probes maxime, quem & summum  
rerum sacrarum Antistitem, & facun-  
dissimum ac disertissimum Eloquentiæ  
Præsidem jure ac merito appellare pos-  
sumus. Tu enim, Pater Beatissime, ab  
injun-

ineunte ætate bonis artibus, ac Græcis latinisque literis probe imbutus, ad summi Sacerdotii fastigium evectus nihil antiquius habuisti, quam, ut veterem illam pene intermissam priscorum Pontificum, copiosam scilicet sublimemque Eloquentiam ab sacris divinarum Scripturarum fontibus derivatam mirifice renovares. Quare magnificum illud gravissimumque dicendi genus rerum, divinarum majestati scite respondens, quod ego hac disputatione pro mea virili, a sacris præsertim oratoribus usurpandum prædico e celeberrima Romanæ Sapientiæ specula, in qua (quæ tua beneficentia fuit) me veluti Eloquentiæ præconem stare voluisti; illud inquam ex te uno discere possunt omnes, qui se divinarum, humanarumque literarum amatores profitentur. Utinam sacri nostri oratores, orthodoxique Theologi, exemplum, quod præ oculis habent in facundissimis tuis lucubrationibus, quas Tu de rebus præstantissi-

a 2

mis,

mis, atque de altissimis religionis Christianæ mysteriis tam præclare, tam eleganter instituis, fideliter ipsi exprimant aliquando! Jam profecto apud omnes in pretio erit pudica illa & sobria atque optimi succi plena Eloquentia, cujus, ut ille ait, *insignis est indoles in verbis verum amare, non verba*. Jam detractis meretriciis calamistris, ac rejectis nugacibus ornamentis, quibus hætenus per summam quorundam scitulorum amentiam non jam ornari, sed deturpari visa est, grandi gravique passu incedet Eloquentia, pristino suo nitore ac majestati restituta. En igitur, Pater Sanctissime, quod primum in causa fuit cur Tibi disputationem hanc meam de necessitate atque usu Eloquentiæ, humaniorumque literarum in addiscendis tradendisque rebus sacris, inscriptam voluerim: ut nimirum divinæ Eloquentiæ præceptis, quæ Deo auspice, res sacras pertractaturis tradere cogito, summum, omnique ex parte perfectum exemplar, quod in Te  
uno

uno mirifice elucere video, copularem: indicaremque omnibus ad sacram Eloquentiam properantibus quod imitatione complecti debeant: quod si probe effecerint, multum in sacro dicendi genere se profecisse noverint. *Facilius* enim, inquit Magnus Aurelius Augustinus *adharet Eloquentia audientibus eloquentes, quam Eloquentia precepta sectantibus*. Accessit autem & altera caussa cur Tibi Dissertationem hanc sisterem, Pater Sancte: quæ quidem me, volentem tamen, penitus impulit, ut primum ingenioli mei fœtum, in Romana Academia a me productum, qualecumque illud fuerit, nomini tuo dicarem. Ea est a paterna tua munificentia accepti beneficii ratio, quæ a me jure quodam suo requirit, ut quam maximi beneficii memorem aliqua saltem grati animi significatione testatam velim. Quod quidem hoc pacto faciam, (aliter enim nequeo) ut quidquid fecerim, tuo semper nomini sit devotum. Servet Te diu incolumen Deus

Opti-

Optimus Maximus , Pater Beatissime,  
ut post horum temporum acerbitatem,  
& acrius ad ulciscendas religionis inju-  
rias , & vehementius incumbere possis  
ad fidei incrementum , ad Christianæ  
Reipublicæ utilitatem , ad bonarum ar-  
tium præsidium, atque ornamentum .

# FACULTAS

Reverendissimi Patris Generalis Ordinis Minorum  
Sancti Francisci Conventualium.

**C**um dissertationem De usu & necessitate Elo-  
quentiæ in rebus sacris tractandis, habitam in  
Archigymnasio Romanæ Sapientiæ a P. Magistro Ale-  
xandro Burgos Messanenfi sacre Congregationis In-  
dicis Consultore, & in eodem Archigymnasio publico  
Eloquentiæ professore, duo nostri Ordinis Sacre Theo-  
logiæ Magistri, quibus id commissimus, recognoverint,  
& in lucem edi posse probaverint; facultatem conce-  
dimus, ut typis mandetur, si ita jis, ad quos spectat,  
videbitur. Datum Romæ die 18. Novembris 1709.

Fr. B. Angelus Carucci Minister Generalis.

Fr. Daniel Montarini Secretarius  
& Assists Ordinis.

Locus † sigilli.

IMPRI-

IMPRIMATUR,

Si videbitur Reverendissimo Patri Magistro sacri Palatii Apostolici.

*Dominicus de Zaulis Archiep. Theodosia Vicesg.*

---

**J**ussu Reverendissimi P. Paulini Bernardinii S.P. Ap. Mag. legi dissertationem, cui titulus De necessitate, atque usu Eloquentiæ, humaniorumque literarum in addiscendis, tradendisque rebus sacris a R. A. P. Fr. Alexandro Burgos S.T.M. Ord. S. Francisci Min. Conv., ac in Archigymnasio Romanæ Sapientiæ publico Eloquentiæ professore conscriptam. In ea nihil legi, quod fidei orthodoxæ, probatisque moribus adversetur. Romæ kal. Decembris M DCC IX.

Ita censeo ego Fr. Thomas Maria Minorelli Ord. Præd.

**D**issertationem Rev. admodum Patris Fr. Alexandri Burgos Min. Conv. quæ inscribitur De usu & necessitate Eloquentiæ in rebus sacris pertractandis quam jussu Reverendissimi Patris Paulini Bernardinii sacri Palatii Apostolici Magistri diligenter perlegerim, in eaque nihil offenderim, quod a Catholica fide bonisque moribus abhorreat, multaque immo viderim, quæ sacrarum literarum studiosis utilitatis plurimum sint allatura; idcirco si ad quos pertinet, ita videbitur, eam typis dignam censeo. Ex ædibus Columnensibus IV. Non. Decembris M DCC IX.

Joannes Vignolius.


---

IMPRIMATUR,

Fr. Joannes Baptista Carus Magister, & Reverendissimi P. Paulini Bernardinii sacri Apostolici Pal. Mag. Socius Ord. Præd.

DE

DE USU, ET NECESSITATE  
E L O Q U E N T I Æ  
IN REBUS SACRIS TRACTANDIS.



DISSERTATIO.



EMO vestrum, Auditores, aut eorum, qui vim Eloquentiæ sentiunt, usumque cognoscunt, mirari profecto poterit, me, qui tot annos in Scholis Theologorum, assidue sim versatus, nunc subito, mutato consilio, ad humaniorum Literarum castra remigrare, atque ita Eloquentiæ causam agere, quasi veteris meæ consuetudinis oblitus omnino fuisset; & non jam disputatoris subtilis, sed copiosi oratoris nomen mihi adiscere studiose contenderem.

Nostis enim, viri eruditi, cum *omnes artes, ut ille ait, quæ ad humanitatem pertinent, habeant quoddam commune vinculum, & quasi cognatione quadam inter se contineantur*, nostis inquam, quanta sit cum bonis quibuscunque artibus, ac sacris præsertim studiis Eloquentiæ, humaniorumque literarum mirifica sane, singularisque consensus. Nostis quanta ha-

A                      ctenus



atenus fuerit, eritque semper Eloquentiam inter & sapientiam indivulsa societas; quantumque ex mitioribus hisce studiis maximæ quæque res capiant adjumenti. Quare si hac de re tantummodo vobiscum agendum foret, jam me ab omni prorsus præfandi onere in hoc dicendi limine liberatum esse sentirem. Facile enim, etiam tacentibus nobis, apud eos, qui justum rebus singulis pretium statuere solent, Eloquentia seipsa defenderet: jusque suum non injuria ad res sacras pertractandas se extendere posse nullo negotio demonstraret. Verum cum non dubitem fore plerosque præposteros quidem, ineptosque judices, qui leve hoc argumentum & non satis dignum viro Theologo judicent; quique putent perversa, falsaque opinione decepti, quæ apud vulgus inolevit, impleri posse numeris omnibus Theologici muneris dignitatem, vix delibatis primis grammaticæ rudimentis; iis vero literis penitus neglectis, quæ eruditionis nomine a veteribus, humanioresque appellantur; operæ pretium me facturum arbitror, Auditores, si in hoc primo dicendi aditu, morosos hosce Eloquentiæ reprehensores, oforesque humaniorum literarum probe commoneam, evellamque radicitus, quantum potero, male eorum mentibus adhærescentem falsam hanc opinionem, qua Theologiæ studia, spreto penitus humaniorum literarum, atque Eloquentiæ subsidio, perfici posse contendunt.

Quod si ex illorum numero ji sint, qui, ut Tullii verbis utar, *ad quamcumque sunt opinionem, quasi tempestate delati, ad eam tamquam ad saxum adhærescunt*; ac proinde & ad bonam mentem redire, &  
male

male conceptum semel errorem sibi exuere noluerint ; non propterea operam omnem hac nostra adversus eos disputatione nos luisse arbitramur . Etenim mihi pro veritate dicenti , laboris atque industriæ , qualis qualis illa fuerit , maximus , uberrimusque fructus constabit , si ab hac opinione retrahere penitus atque abducere conabor animos adolescentum , qui ad sacrarum literarum studia non segniter accedunt : illorum præsertim , in quibus magna nunc spes instaurandæ Theologiæ secundum pulcherrima , nitidissimaque exempla veterum Patrum , est collocata . Quare ad explicandam rationem sententiæ meæ ita paratus ingredior , Auditores , ut excussa funditus vulgari , quam modo dixi , quorundam opinione , gravissimum de hac re doctissimorum virorum iudicium probem maxime , quo statutum , atque decretum est ,

*Neminem rerum divinarum , solertem , copiosum , dilucidum , omnique ex parte perfectum disputatorem absque literarum humaniorum et Eloquentiæ adminiculo pro dignitate futurum : adeo , ut quanta sit in rebus sacris tractandis humaniorum literarum utilitas , atque necessitas , ac qualis etiam , quantusque esse oporteat in hisce studiis veræ solidæque Eloquentiæ verecundus , ut ita dicam , ac nativus usus , omnibus , qui ad sacras disciplinas animum intendunt , clarius innotescet . Quod quidem non dubito , quin vobis , atque omnibus , qui sacrarum amatores se profitentur literarum , jucundum , pergratumque videatur ; cum præclara illa studia , quibus doctissimi Ecclesiæ Patres ac Theologiæ Parentes res sacras olim illustra-*

runt,

runt , in memoriam revocet ; atque ea ob oculos ponat , quæ viri omnium eloquentissimi , sanctissimique senserint , de omni , sacra illa quidem , ac Theologo digna ratione dicendi .

Illud vero in primis positum velim , Auditores , quod in decursu orationis magis , atque magis intelligatur , non illum scilicet , nos hic in medium constituere Theologum , qui soli divinarum rerum contemplationi additus , sibi tantum , ac Musis intra sipharium canere statuerit ; sed qui ad obeunda Ecclesiæ munia vocatus , communi populorum utilitati inserviat ; qui & rudibus mysteria fidei explanet ; qui & adversus heterodoxos religionis dogmata propugnet ; qui & res in Ecclesia gestas vel literis mandet ipse , vel ab aliis mandatas explicet , ac singula venerandæ antiquitatis rudera diligenter evoluat , qui & in scholarum pulvere ad sacra studia Adolescentes exerceat : quique tandem magna sibi rerum ubertate , ac quasi silva dicendi ex Sacrarum Scripturarum fontibus , ex Sanctorum Patrum scriptis , atque ex reliquis solidarum rationum momentis copiosius deducta , gravi simul , ac jucunda , inflammataque oratione seu vitia reprehendat , seu commendet virtutes , ita dicat , ut hominum cætus dicendo teneat , mentes alliciat , voluntates impellat quo velit , unde autem velit deducat. Hunc sane Theologum , quem modo dixi , ab omnibus humaniorum literarum subsidiis instructum volumus , & jure quidem optimo volumus eloquentem ; sed antequam singula percurramus unum generatim dicam , quo tota quanta est , quasi solidissimo fundamento nostra inædificari posse videtur oratio .

Duo-

Duobus profecto oratione & ratione cæteris nos præstare animantibus apud omnes in confesso est, Auditores. Eo igitur tota quanta est in addiscendis, tradendisque disciplinis humanæ mentis acies collineare debet, ut quæ percipit, recta ratione percipiat, & de his, quæ sunt scientia, & cognitione comprehensa, si cum ceteris oratione communicare contendit, recta itidem oratione communicet. At quid id unquam recte efficere poterit, quisquis ille erit, cujusvis doctrinæ, sive indagator, sive præceptor, qui fuerit ab humaniorum literarum præsidio destitutus? Constat enim neminem sine istis elementaribus, ut vocant, rudimentis, ac sine rectæ Eloquentiæ præcognitione, atque usu, quæ faciem præbeant ad intelligentiam scriptorum illorum, qui scientiarum præcepta his literis, his dicendi modis memoriæ prodiderunt, plenam ac perfectam earundem scientiarum notitiam consequi posse. Neminem item posse genuinum germanumque præceptorum sensum eruere; nisi verborum ille vim, ac linguæ, qua scripta sunt, indolem, ac genium, stilique proprietates apprime calluerit. Nam quot videmus, qui secus faciunt, ac festinato cursu ad scientiarum penetralia cruda adhuc studia afferunt, humanioribus literis vix leviter tinctos, sædissime labi, atque in terribilissimas immanesque foveas imprudentes incidere? Res siquidem (ut ex Tullio clarissimus Vossius in præfatione, Aristarcho suo præfixa monet opportune) in singularum disciplinarum asssecutione ita se habet, quemadmodum in agris, quos proscindi opus multo ante, quam conferantur: aut cum lanis, quæ antequam

quàm purpuram imbibant, prius sufficiuntur medicamentis quibusdam. Oportet igitur humanitatis, atque Eloquentiæ præexercitamentis primas aliarum scientiarum lineas ducere, jisque ante excoli animos, & ad virilem sapientiam concipiendam imbui, ac præparari.

Quod si mandare literis, aut verbis explanare velimus quæ mente percepta sunt, summarum disciplinarum cogitata; dicant quæso, dicant isti superciliosi humaniorum literarum contemptores, qui puerilia hæc, & vulgaria autumant, dicant quonam unquam pacto id explanare, non dico jam diligenter, non plene, non copiose, sed vel tenuiter poterunt absque verborum delectu, absque propriis dicendi formulis, absque apta verborum junctura, absque recta argumentorum dispositione, sine vi, sine nervis, sine proba, ac pudica venustate elocutionis.

Heus! homines, sapientum judicio aberrantes, & vestro sapientes, si quid vobis scribendum occurrat, si quid in concione virorum doctorum memoriter pronuntiandum; ut hæret vobis aqua! ut pueriliter reptatis! ut omnia susque deque versatis! Sed linquamus istos *infantissimos*, ut Tullius inquit, *dialecticos, jejunosque disputatores*. Nos authoritati doctorum hominum, quæ nobiscum facit, assensionem adjungamus, putemusque firmiter, (omnes enim cum Vossio sic habemus persuasum,) eos, *qui sapientiæ, & literarum humaniorum divortium faciunt, nunquam ad solidam sapientiam perventuros: eos vero, qui alios a literarum hujusmodi, linguarumque studio absterrent, non antiquæ sapientiæ, sed novæ opinionis*  
Docto-

*doctores habendos esse.* innumera enim sunt commoda, quæ ex mitiori literatura, atque Eloquentia ad ingenuarum artium, scientiarumque studia redundant. Quæ vero si non adessent, adfunt autem quamplurima; non minimi certè facienda est incorrupta quædam ratio rectè judicandi, quam quidem ex solido humaniorum literarum contubernio reliquarum facultatum sectatores haurire solent: quæque in omnes scientiarum omnium, ut ita dicam, artus, quasi firmæ valetudinis color quidam occulte pervadit, seseque diffundit: quæ & distincte, & distribute, & eleganter, & ornate scribere docet: qua denique fit, ut quæ inter se nexa & jugata esse debent, rectè juncta dicamus, & rectè: illudque æquabile dicendi genus sequamur, quod & complectatur verbis, quod vult, & plane dicat, quod omnes intelligant. Et sane ut statim manifesto indicio prodit, bonam habere mentem scriptor eruditus; ac prudens, qui clare, qui perspicue, qui nitide explicat, quod explicandum est! Ut illum habere, quod verbis exprimere vix possumus, optimi saporis gustum, quandam scilicet ingenium inter & judicium perfectam harmoniam, atque consensum: Quæ duæ res valde difficiles, ac raro inter se coeuntes; ubi quandoque in unum coalescere visæ sunt, mirabiles illos, egregiosque Magistros pepererunt, in omni doctrinarum genere facile Principes, qui scriptiones suas æternitati consecrarunt. Horum itaque inhærendum vestigiis, Auditores, atque eorumdem exemplo frequens sit humaniorum literarum usus cum rerum gravissimarum pondere conjunctus; frequens cum scriptis disertissimorum

morum virorum, qui veram sapientiam veræ Eloquentiæ lumine vestierunt, familiaritas; frequensque commercium. Nam hujus rei causa nobis eveniet, quod olim sibi Romanæ Eloquentiæ Parens ex hujusmodi optimorum librorum lectione evenisse testatur: ut nimirum, sicut quum in sole ambulamus, etiamsi aliam ob causam ambulemus, fieri tamen natura solet, ut colorem, caloremque aliquem induamus, sic quum disertos, doctosque libros studiosius legerimus, orationem nostram, illorum luce quodammodo inflammari, & quasi colorari sentiamus. Et hæc quidem est, quæ ad omnes disciplinas bene, copioseque tractandas ex humaniorum literarum usu egregia illa quidem ac magna promanat utilitas. Nunc vero pressius ad rem nostram veniamus; quantaque sit in rebus Theologicis hujusce adminiculi necessitas atque usus, invicte probemus. Etenim animo vos tenere arbitror, quod ego initio dicendi, non satis tamen explicatum recensui, Auditores, principem scilicet locum inter Theologi munera illud sibi jure optimo vindicare, quo vires suas omnes ipse exerit, ut illorum pervicaciam, qui a mendacio stant, atque antiqua Christianæ Religionis dogmata convellere, novaque superinducere audent, probe retundat; unde a priscis accepta Patribus orthodoxæ fidei statuta confirmet. Hujus rei gratia scholastico in pulvere umbratiles pugnas conferit, & strenue defudat, ut nimirum probatis in palæstra viribus, in apertum inde campum exertis lacertis descendat, deque veritatis hostibus palmam tandem aliquando reportet. Propterea sic fingi, formarique debet Theologus, atque jis præ-

præfidiis instructum esse oportet, ut veritatis assertorem ac vindicem decet, qui ita veritatis causam acute simul & nervose agat, atque jis utatur armis, ut persuadeat, ut vincat. Jam vero hæc petenda sunt, tanquam ex quodam sibi parato armamentario, ex Sacris Scripturis, ex Apostolicis divinisque traditionibus, quæ Sanctorum Patrum, & Conciliorum decretis continentur. Verum quo pacto unquam poterit armorum hujusmodi vim intrinsecus pernoscere? Scripturarum, Conciliorum, Patrum sensa, involuta illa quidem aliquando, & non satis explicata penitus introspicere, ac funditus penetrare quo pacto unquam poterit? Quo pacto unquam poterit ex his ea seligere, quæ ad rem faciunt, ordine suo scite collocare, communes argumentorum locos virili manu tractare quomodo poterit, nisi ipsi præluceat, semitamque sternat humaniorum literarum, ac sublimis, masculæque Eloquentiæ non levis, & perfunctoria, sed profunda, sed bene subacta cognitio? Exemplo hujusce argumenti energiam illustremus. Occurrat aliqua de Sacræ Scripturæ interpretatione perdifficilis & perobscura quæstio, ac variis difficultatibus implicata. Novatores, qui hoc in negotio pessime falsi sunt, quum se a veritate destitutos plane sentiunt, sentiunt autem se plurimum valere in linguarum peritia, Græcis, Ebraicis, Latinisque literis probe imbuti atque instructi, rem totam Theologicam ad Grammaticorum tricas callide redigant, atque solius distortæ, pravæque rationis ductu, Sacræ Scripturæ autoritatem, aliter, atque Ecclesia Catholica, interpretentur. Quid his reponet Theologus linguarum,

B . huma-



humanarumque literarum plane rudis? Næ causa sua, etsi optima illa sit, cadet: næ fasces Heterodoxis submittet: næ ludibrio apud eos erit, qui his strophis vim veritatis eludunt. Nescio quonam malo fato, Auditores, sive, ut castigatius loquar, Dei Optimi Maximi permissione factum est, ut qui adversus Ecclesiæ arcem perduellionis signa audacius extulere; ji pene omnes bonis artibus imbuti, quibus humanitatis studia comprehenduntur, & doctarum linguarum cognitione, & universæ propemodum profanæ eruditionis gloria florere visi sunt! Id fortasse accidit, aut ego fallor, ut superba eorum audacia & confidentia, quæ semper fuit hæreticorum indoles, intumescens naturæ viribus in criminis pœnam relicta, de inani sibi foliorum strepitu blandiretur, & fructum omnem veritatis amitteret: contra vero veluti a somno excitata scholarum Catholicarum socordia pristinam sacrorum studiorum rationem, pene intermissam, ardentius instauraret. Hinc renata in Ecclesia Tridentini Concilii autoritate Græcæ, Ebraicæque linguæ studia! Hinc humaniorum, divinarumque literarum copiosa supellex tota se liberaliter explicuit. Hinc grandis illa & suis compacta nervis Sanctorum Patrum facundia postliminio revocata. Hinc tandem, quasi rigido adversantium attritu acriter perfricta, scabritie ac rubigine posita, sacre Theologiæ arma omni ex parte perpolita novum vivacioremque colorem induerunt. Quæ quidem tot, tantosque radios inde emisserunt, ut jis perfricta inimicorum acies obtusa penitus atque tenebris obruta videretur. Ne igitur bene constitutum a majoribus Theologicum  
agmen

agmen ignavia nostra dissipemus ; ne acceptum a peritissimis Theologicæ militiæ ducibus adversus hæreticorum copias dimicandi morem probatissimum corrumpamus , humanioribus literis majorum exemplo sacræ Theologiæ arma perpolienda sunt . Hinc studiis linguarum latinæ , & græcæ præsertim , atque Eloquentiæ , universæque eruditionis subsidio arx summa Theologiæ communienda est , eo ferme more , quem summis ingeniis , exquisitaque doctrina præditi Sancti Ecclesiæ Patres secuti sunt . Non enim haberemus Maximum in exponendis Sacris Scripturis Doctorem Hieronymum , nisi ille Romæ adolescens in his liberalibus disciplinis a Donato , & ab aliis viris doctissimis fuisset multo ante eruditus . Non summi Theologi cognomento Nazianzenus Gregorius ; non Magni Doctoris titulo Basilii in Ecclesia inclaruissent , nisi uterque Athenis sæcularibus literis instructi ad explicandos Sacræ Scripturæ libros verius , & uberius præ aliis accessissent . Quam ob rem hortor omnes vehementer , qui sacris literis nomen cum utilitate daturi sunt , ut hujusmodi adjumentis , quæ ab linguarum peritia , atque ab universa bonarum artium coagmentatione ducuntur , magnopere suffulti , heterodoxis , ac veritatis hostibus eripiant arma ; eaque perferant in Ecclesiæ castra ; summo studio , atque industria perpoliant , bonumque in usum convertant . Et profecto convertent , si hisce studiis utantur non ad inanem pompam , sed ad præclaras res nitide , decenterque explicandas , ad investigandos Scripturæ sensus , ad ejusque testimonia roboranda , atque ad veritatem Catholicam forti brachio defendendam . Hæc

enim humanitatis studia in eo genere ponimus, ut ea sacrarum scientiarum non bases, sed ad eas apte percipiendas, tradendasque veluti instrumenta quædam perquam necessaria esse noscamus. Quibus sane & dogmatum veritas recta methodo traditur, & argumenta singula suo loco rite disponuntur: & rationum vis, atque efficacia in bono lumine collocatur. Accedet & aliud commodi genus minime contemnendum. Horum scilicet studiorum beneficio fucatas hæreticorum ratiunculas, qui vaferrime humaniorum literarum artificio abutuntur, & subtiliter pervadimus, & fortiter enervamus. Sed de hoc satis.

Proximus est Theologicorum argumentorum locus ex Sanctorum Patrum autoritate derivatus. Accipite ergo aliam ex hoc loco humaniorum literarum, atque Eloquentiæ non minus perspicuam necessitatem, quam ne cogitans quidem, statim quisquis animadvertat. Quoniam eo tandem deducta est à Novatoribus Theologicorum dogmatum præcipua tractatio, ut qui sanioris apud eos iudicii sunt, Sanctorum Patrum, eorum saltem, qui primis Ecclesiæ sæculis floruerunt, auctoritatem, non omnino quidem respuant, transversum tamen abducant, atque distorqueant: in hanc maxime curam incumbere debet Theologus, ut diurna, nocturna que manu verset eorundem Patrum scripta: genuina a spuris secernat, assutas a falsariis lacinias, interpolationesque distinguat; de stilo judicet; & hæc non temere quidem, sed recte, ac religiose peragat: illorum sensa integre, atque explore percipiat; eaque a nobis adversus veteres, novasque corruptelas liqui-

dissi-

diffime stare demonstret : simul & hæreticis ostendat , nullum novitiis eorum commentis a Patrum testimoniis esse præsidium .

Cum verò felicia illa , fœcundaque ingenia omni doctrinarum genere exulta sublimem , divinamque , explicent sacrarum rerum tractationem cum lautissima eruditionis universæ supellectile conjunctam , nemo ad præclaros illos cælestis sapientiæ fontes summa labia admoveere poterit , qui prius , quæ sunt a mitioribus hisce studiis suppeditata adjumenta , altius imbiberit , & constanti animo retinuerit . Quis enim fieri potest , ut e Patrum lucubrationibus germanas expediat sententias , qui græcæ , latinæque linguæ genium non affecutus fuerit ; qui vocum proprietates , qui usitatas illis temporibus dicendi formulas non expedite pernoverit ! qui methodum tractandi , qui Eloquentiæ vim , totamque argumentorum texturam non perviderit ? Ecquis , amabo vos , Principes illos e Græcis Patribus , ut reliquos præteream , Clementem Alexandrinum , Origenem , Athanasium , Basilium , utrumque Gregorium , & Nazianzi & Nyssæ Episcopum , probe unquam intelliget sine Eloquentiæ , & linguarum adminiculo ? E latinis vero , ( ut de Ambrosio taceam , cujus dictio plane Romana , sed pressa aliquantulum nec satis aperta ) quis Tertullianum in Apologetico præsertim , quis Arnobium , quis Minucium , quis Cyprianum ita funditus mente comprehenderit , ut eorum sensus explicet aliquando plane involutos , nisi hujusmodi Patrum & dialectum , quæ Græcis idiotismis fere scatet , qualem omnes sciunt ut plurimum fuisse Africanorum Patrum , & in-

& insolentem eorum phrasim diligentissime tenuerit ? Scio nonnullos mire turbare, & permiscuisse omnia, ubi apud Cyprianum quid sit *formam dari*, & *formam innotescere*, nunquam potuerunt satis habere perspectum. Quid autem sit apud eundem Cyprianum, *exhibere se*, *exhiberi*, *habere exhibitionem*, ita absurde intellexit nuperus quidam farcinator, ut a germana hujus dictionis significatione, antiquis jurisconsultis alias familiaris, toto sane aberraverit Coelo, pessimeque lapsus sit, propterea ab eruditis turpiter & merito irrisus. Nunquam ergo (hi nobis errores documento sint) ad Patrum lectionem præcociter & illotis, ut ajunt, manibus accedamus, Auditores. Bonarum artium studia impeditam alioquin Theologiæ Patrum viam multo ante consternant, atque expeditam complanent. Sæpe enim Patres & Scriptores rerum Theologicarum, authorum profanorum sententias laudant; sæpe ad mores, ad instituta, ad usus Ethnicorum, atque ad alia id genus, ad illorum temporum disciplinam spectantia alludunt; quæ quidem absque subsidio humaniorum literarum nunquam intelligas. Neque aliorum oculis semper omnino fidendum, Auditores, neque Patrum dicta ab aliis laudata absque proprii judicii pensitatione laudanda sunt: aliter enim sæpenumero de locis authorum statuas, si seorsum hac illac divulgata & sparsa legantur: aliter si apud authores ipsos antecedentium & consequentium ratione habitâ expenduntur. Porro ut clarius innotescat quantum hoc in negotio Theologorum intersit in Patrum scriptis hospites non esse & peregrinos, sed literarum humaniorum,

atque

atque Eloquentiæ beneficio ea optime callere, quæ Patres literis mandata reliquerunt, unum addam sedula profecto animadversione dignissimum. Joannes Dalæus hæresis Calvinianæ in Gallia sectator, eruditionis inter suos minime contemnendæ, ut erat, si quis alius, vir non hebetis ingenii, & in veterum lectione versatus; callide pervidit, quam fortiter Sanctorum Patrum auctoritas novitias suorum gregalium opinionationes labefacteret. Edidit propterea librum *de recto usu Patrum*, ut sibi blanditur, inscriptum, Gallicè primum, deinde latinitate donatum. Quo quidem libro, eò nervos omnes intendit homo vaferrimus, ut in dirimendis quæ de fide orthodoxa in dies oriuntur, controversiis, jus omne a Sanctis Patribus penitus, atque penitus abjudicaret. Quibus vero armis id se confecisse gloriatur; audite: *Patrum*, inquit ipse, (statim a limine in argumentorum synopsis.) *Patrum maxime primi, secundi, & tertii sæculi pauca scripta habemus. Quæ verò habemus illius ætatis scripta, de rebus alienissimis ab hodiernis controversiis agunt. Scripta, quæ Patrum nomen præferunt, eorum revera non sunt omnia, sed pleraque seu olim, seu postremis sæculis conficta: Genuina Patrum scripta multis in locis, tempore, imperitiis, fraude vel pia, vel maligna, antiquis & postremis sæculis adulterata fuerunt. Difficile est Patrum scripta intelligere tum propter linguas (hæc, quæso attentius animadvertite) tum propter linguas & idiomata, quibus utuntur, tum propter rerum explicandarum variis plerumque rhetorices figuris & ornamentis, dialecticæque aculeis & argutiis, & bujus-*

*bujusmodi artibus obscuratam, & impeditam rationem, tum quod vocabula ut plurimum longe alio, quam qui nunc in usu est, sensu usurpent. Tandem quantumlibet diserte posita sententia in Patris alicujus scripto occurrat, non possumus ideo statuere ipsum in ea fuisse; cum sæpe aliena a mente sua scripserint Patres, seu aliorum sententias suppresso nomine referant (quod frequenter in Commentariis faciunt) seu in disputationibus cum adversariis: quo in Scriptorum genere aliud dicere, aliud sentire sibi licere autumant, seu quid sentiant, dispensatione aliqua dissimulent, ut in Homiliis, quo ad captum quorundam auditorum se accommodent. Hæc ille & similia magno Eloquentiæ apparatu amplificat & coacervat. Refutarunt sane hujus audacissimi hominis strophas & quidem probe, nonnulli erga Patrum venerandam canitiem obsequentiores, ex iis etiam, qui cetera cum Dallæi erroribus adversus Romanam Ecclesiam consensere: quos inter principem locum tenet, ut mea fert opinio, Georgius Bullus Anglicanæ (utinam Romanæ) Ecclesiæ presbyter doctissimus. Sed quis potuissent, nisi & linguarum & Eloquentiæ & Critices & universæ propemodum eruditionis copia, adjumenta suppeditasset! At nos, ad quos maxime attinet hujusmodi mendaciorum struem funditus evertere, muti erimus? Elingues erimus, Auditores? Similes ne erimus obscuri nominis Theologo cuidam, qui e scholarum angustiiis nunquam egressus, audito nuper *discipline* arcani vocabulo, (ea est, ut bene norunt eruditi, provida quædam disciplina non prodendi in Ethnicorum & Cath-*

theumenorum vulgus aperte Sacramentorum Myſteria) audito, inquam, hujus *discipline arcani* vocabulo, tanquam viſa Gorgone perterritus hæſit & obriguit. Similes ne erimus alteri ejusdem notæ Theologo, qui, facta ab erudito viro de *tribus* famoſis *Capitulis* mentione, & quid, inquit, malum, *trium Capitulorum* nomen ſignificat? Enim vero impares erimus (equidem ego ita exiſtimo) ad ſubdola iſta argumenta ſub fallaci Eloquentiæ & eruditionis larva in ſcenam prodeuntia, ſi artis criticæ regulas ignorabimus; ſi ab Eloquentiæ artificio, & humaniorum literarum notitia, erimus deſtituti. Secus autem rem eventuram certo certius fore confidimus, ſi ad Theologicas meditationes humaniorum literarum ſupellex acceſſerit: quibus & quænam ſint genuina Patrum ſcripta, & quinam apud illos Eloquentiæ uſus, & quænam argumentandi, & reſellendi methodus, & quinam ſcribendi ſcopus & occaſio, quæve tandem ipſi veluti Traditionis teſtes affirmant, quæve repudient, luce meridiana clarius demonſtrabimus. Id vero muneris egregio ſcribendi genere & ad rem apprime facto exequemur, quoties nervoſa ſimul & ſucci optimi plena Eloquentia noſtrarum partium momenta (quæ diſertiffimis novatorum mendaciis appoſite respondeant) condiemus. Scite enim Auguſtinus in quarto libro eorum, quos de Doctrina Chriſtiana inſcripſit, ſacræ, divinæque Eloquentiæ uſum contra hujusmodi hoſtes Theologo doctori non minus eleganter, quam argute commendat. *Nam quis audeat dicere*, inquit ipſe, *adverſus mendacium in deſenſoribus ſuis inermem debere conſiſtere verita-*

C

tem,



tem, ut videlicet illi, qui res falsas persuadere conantur, noverint auditorem, vel benevolum, vel intentum, vel docilem proamio facere, isti autem non noverint? Illi falsa breviter, aperte, verosimiliter: & isti vera sic narrent, ut audire tadeat, intelligere non pateat, credere postremo non libeat? Illi fallacibus argumentis veritatem oppugnent, asserant falsitatem; isti nec vera defendere, nec falsa valeant refutare? Illi animos audientium in errorem moventes, impellentesque dicendo terreant, contristent, exhalarent, exhortentur ardentem. Isti pro veritate lenti, frigidique dormitent? Quis ita desipiat, ut hoc sapiat? Haecenus more suo præclare magnus & Theologiæ, & Eloquentiæ magister Augustinus.

Quæ cum ita sint, author sum ego vobis, Adolescentes optimi, quibus Ecclesiæ gloria & Theologiæ dignitas cara est, ut animo huiusce rei magnitudine comprehensa, in id studii tempus aliquod insumere & humanioribus literis sedulam locare operam fatagatis. Nemo enim, non mea quidem, sed viro-  
rum doctorum sententia, Theologus esse poterit omni laude cumulatus, nisi fuerit omnium rerum, quas ante dixi, ac bonarum artium scientiam consecutus.

Sed ecce tibi è transverso nonnullos, quibus hæc studia frigescunt, nescio quid indignabundos ogganire, & mihi succensere vehementer. Quid ita? in-  
quiunt. Anne Regina scientiarum Theologia admi-  
nutas grammaticorum tricas, ad rhetorum compedes redigenda erit, ut non nisi comptula, & verborum pigmentis illita in medium procedere audeat? Altioris  
pro-

profecto, ac liberioris indolis illa est, ut se in angustum dicendi genus cogi, adstringique patiat; ut syllabas numeret, ut periodos quadret, rotundetque: fructus illa amat, floresque habet suos; alienis non indiget ab ociosis declamatoribus putide conquisitis. Indecorum ac minime congruum, pudicam matronam meretricio fuce deturpare. Mellitos verborum globulos exquirere, dicta quasi papavere, & sesamo sparsa virum Theologum confectari, atque jis gravissimas rerum divinarum sententias aspergere, & incrustare, quam ridiculum, quam turpe erit? Bene est, bene est, Auditores. Lupum, ut in proverbio est, aure teneamus. Ipsi profecto se jugulant suismet armis, qui talia effutiant, atque optimæ causæ favent, dum illi putant se adversari. Ecquis unquam sanus, o boni, ipsa reclamante materia, talem cogitavit obtrudere ad res Theologicas pertractandas, qualem vos fingitis, Eloquentiam? Equidem juratus affirmo, vos nunquam ne de facie quidem quæ sit vera Eloquentia cognovisse. Attendite quæso, quam falsi estis, ac quanto in errore versamini. Atque illud in primis memoria recolendum est, firmiterque tenendum, Eloquentiam scilicet, quam in Theologo requirimus, masculam illam esse oportere & robustam: non calamistris inustam, non effeminatam; sed quæ rerum sublimissimarum naturam & majestatem scite consequatur, & exprimat. Nolumus enim, ut omissis rectissimis ac solidissimis studiis, quæ Theologiæ fundamenta sunt, consumat omnem operam Theologus in rhetorum exercitationibus, quod Oratoris officium est; nec, ut ejus omnis in

dicendi studio occupetur industria . Non fufum illud , ac circumductum dicendi genus , Tullianæ Eloquentiæ proprium , non ardentes , inflammatosque Demosthenis fpiritus ubivis intempeftive feâari debet . Neque nimis anxie periodicam illam , & ad lancem perpenfam numerosam periodorum rationem , qualem fuiſſe conſtat Iſocratis , in ea præſertim ad Athenienſes habita Panegyri , quam alii decem , alii quindecim annis elaboratam eſſe , memoriæ prodiderunt . Ratio enim ipſa , atque ipſamet vera Eloquentia nunquam a rectæ rationis ductu nec latum unguem abſcedens , in hanc potiſſimum nos ſententiam ducit , ut rerum divinarum majeſtatem adſciticio , exquiſitoque ornatu nullo modo veſtiamus . Id unum Eloquentia , & ratio Eloquentiæ magiſtra , cum Theologos humanioribus literis inſtructos volunt , appoſite præcipiunt , & ſane jure ſuo præcipiunt , ut nimirum & idiomatum gloſſemata , & dicendi formulas , & peculiare authorum ſacrorum phraſes internoscamus : ne cæce ac temere de ſententiis eorundem aliter , atque judicandum erit , judicium ſine judicio proferamus ; ne inſcitiam noſtram prodamus : ne ab Adverſariis , harum literarum callentiſſimis turpiter irrideamur . Quod ſi mentis noſtræ cogitationes de rebus Theologicis explicare aliis velimus : id dicat Eloquentia , quod & ratio dicat , ut acute quidem , ſed clare , ſed diſtincte , ſed ordinate , modeſta , ac temperata quadam elegantia , quod explicandum fuerit ; explicemus , memores præcepti illius Poeticæ artis magiſtri , qui recte ad rem noſtram cecinit .

*Ornari res ipſa negat , contenta doceri .*

Nam

Nam est quoddam Eloquentiæ genus peculiare, in addiscendis, tradendisque severioribus quibusque ac sacris disciplinis usurpandum (didacticum appellant) quod suam habet elegantiam, suasque Veneres habet quidem, sed in methodi perspicuitate & in sobriæ dictionis puritate collocatas. Quo fit, ut gravissimorum rerum Tractator nunquam ab ipso causæ cardine, omiffa controversiæ sede, quod plurimi, qui tamen facundi ingeniosique videri volunt, non raro faciunt; in aliis minime controversiis expatiatur: quo nullum gravius in Scriptore vitium. Hoc enim est offendere in limine, & in ipso itineris exorsu, ut quidam ait, e via deflectere. *Non est, non est* (inclamat Divi Augustini verbis sobria ac recta Eloquentia) *non est Eloquentem, disertumque Theologum esse, campos verborum nequicquam captare, in quibus ventose & inaniter curras.* Nam aliud est, quantum ad probandam causam suam sufficit argumentorum testimoniorumque, eleganter & nitide promere, aliud inani verborum, utut elegantissimorum, strepitu, copias omnes suas incondite in aciem adducere ostentationis magis, quam victoriæ causa. Postremum istud dicendi genus indecorum ac vitiosum exhibilat Eloquentia, alterum tempori, & materiæ scitissime serviens probat, & amplectitur. Hæ sunt, Auditores, veræ Eloquentiæ de recta rerum tractandarum methodo castæ elegantæ conjuncta, eximia, & nunquam satis laudata axiomata: quæ quam bellissime cum Theologiæ tractandæ methodo conveniant, cæcus sit, qui non videat. Media igitur via, quæ semper tutissima est, incedendum; abusus  
vero

vero & extrema quæque, vitio enim nunquam carent, perpetuo vitanda. Caveant ergo Theologi, ne peregrino atque alieno ornatu Theologiam ineptissime induant, neve suo eam a sanctis Patribus, doctisque viris concessio & tradito denudent. Absit autem omnino, ut, dum electis verbis, & propriis quibusdam elegantiz modis rem Theologicam explicandam docemus, vocabula illa & dicendi formulas sive Patrum, & Conciliorum autoritate firmatas, sive in scholis magistrorum exemplo & communi omnium calculo usurpatas, eliminare velimus. Minime gentium nobis (hæc omnium hominum sanioris iudicii vox est) probari unquam debet eorum distorta non minus, quam temeraria opinio, qui vocabula disciplinarum quarumcumque propria repudiant & exsufflant; atque etiam Theologorum sermonem ad trutinam Ciceronianæ locutionis appendunt. Assentimur enim magno criticorum Principi Julio Cæsari Scaligero, exercitatione prima in Cardanum recte monenti: *non versamur in foro, aut in Romano comitio, sed in communi theatro sapientum sub oculis veritatis, cujus supellectilem atque apparatus, non tam nitidum, quam opulentum esse decet*. Perquam igitur ridicularia res est (ut Plautina voce loquar) anxia illa quorundam & meticulosa diligentia ita contracta, & adducta in angustum, ut non nisi jis utatur verbis, etiam cum religionis Christianæ mysteria & divinarum scientiarum arcana tractat, quæ tantum medio illo ævo auræ latinitatis fuerunt ulitata. Sed & quam præpostera est, & plane inverecunda illorum sedulitas, qui in sacrarum  
lite-

literarum translatione, ut præ cæteris puritati studuisse videantur, & voces Ecclesiæ præcæ usurpatissimas, tamquam scopulos evitant: & idiotismos linguæ sanctæ ab versionibus suis exterminant, tamquam monstra fædissima! Nam quis æquo animo ferat, *lotionem* pro Baptismo, pro Angelo *genium*, pro fide *confidentiam*; vel *persuasionem*, pro Ecclesia *Rempublicam*, pro Synagoga *Collegium* ineptissime substitui? Quis graviter non exardeat, quum illud S. Joannis primum dictum, quod est nostræ Religionis caput, *Verbum caro factum est*, in hæc elegantioris formæ voces, si Deo placet, *sermo caro factus est*, vel *sermo suis corporatus*, audiat indignissime commutari? Nihilominus in hos scopulos aliquando impingunt, non quidem sobrii illi pudicæ Eloquentiæ amatores, sed vel homines latina lingua intemperanter abutentes; vel scioli quidam, ac semiliterati, qui argutuli videri volunt, & veluti equuli nondum bonis artibus cicurati in hisce pascuis *binniunt*, & *subsultant*. Memini me audivisse, magno cum stomacho simul & risu Theologum quemdam, cujus fortasse palato tritum in scholis *Unionis hypostaticæ* vocabulum & Sanctorum Patrum, Conciliorumque religione consecratum, & Theologorum omnium receptissimo usu probatum, fastidiosè sapiebat; illam divini Verbi œconomiam (qui fuit Græcorum Patrum dicendi modus) *divinam diphtongum* appellantem. Bone Deus! quid est hoc monstri? Valeant tandem aliquando delicatuli isti blandiloquentes, atque in ultimas terras cum puditissimis hisce rancidisque mercibus asportentur. Ibi quantum volunt insaniant:

niant : ibi ( date veniam quæso , ut eos suismet phra-  
 bus irrideam ) ibi inquam quantum volunt , per me li-  
 cet & *nusquixerent* , & *nunquixerent* . Hæc enim duo  
 monstrosa verba ex latinissimis particulis *nusquam* ,  
 & *nunquam* illorum nescio quis sibi finxit , ut posse  
 Deum condere , ac conservare res aliquas extra omne  
 & loci & temporis nostri spacium , declararet . Verum  
 a nugis ad seria transeamus . Habet Religio voces sibi  
 proprias . Habet Theologia suas . Habent artes quæ-  
 que & disciplinæ . Jis utantur artifices oportet . Id  
 unum requirimus , quum Eloquentiam & literarum hu-  
 maniorum peritiam in Theologo requirimus , ne scili-  
 cet inquinate , ne barbare , ne incondite scribat . Ce-  
 terum liceat Theologo in scholis perspicuitatis gratia ,  
 ut Adolescentes rerum momenta probe percipiant , ea  
 explicare vocibus etiam novis , sed recta analogia confi-  
 ctis , quæ rem evidentiori luce demonstrent . Dum  
 autem libros de re Theologica conscribimus , prudenti  
 consilio pro rerum & personarum varietate , modo  
 magis , modo minus castigata & limata scribamus .  
 Legendum propterea caput undecimum libri , quem de  
 studiis monasticis scripsit Mabillonius . In eo vir do-  
 ctissimus plurima de hac re , vere aurea , ex Basilio , Na-  
 zianzeno , & Augustino excerpta , laudat ; quibus sci-  
 tissimum Quintiliani testimonium subnectit . Legen-  
 dus item , ac totus & sæpe , & accurate evolvendus  
 Tractatus ille politissimus , quem de stilo , qui in di-  
 dascalico dicendi genere adhiberi possit ab scientiarum  
 præceptoribus & acute & eleganter exaravit Sfor-  
 tia Cardinalis Pallavicinus , vir & sanæ Theologiæ , &  
 veræ

veræ Eloquentiæ peritus. Ex eo didacticæ elocutionis præcepta, quæ ille comparationibus satis aptis explicavit, hauriemus.

Verum ne nos, qui Theologiam bonis artibus instructam, humaniorum literarum, Eloquentiæque limam politam, ac Sanctorum Patrum exemplo facundam volumus & opulentam; Scholasticam Theologiam, quæ modo in scholis obtinet, ac maximo cum Ecclesiæ emolumento radices suas fixit & in dies adolescit, e sede sua deturbare videamur, operæ pretium erit hoc loco, Auditores, mentem nostram explicatius aperire. Non bene profecto, quæ a nobis hætenus dicta sunt, animo comprehenderit qui nos putet de tam mirifica ac necessaria, res divinas addiscendi, tradendique methodo, quæ nunquam satis laudari poterit, pessime aut minus æque sentire. Hæreticorum est illa vox, quæ adversus scholasticam Theologiam, quæ scilicet recte instituta est, debacchatur. quippe qui multum sibi metuunt ab hac strenua, fidissimaque ratiocinandi duce: quæ laxas mendaciorum, errorumque lacinias pressso pede insequitur, atque in angustum redigit; quæ nodos subtiliter extricat, & tricas dissipat; & offusas veritati tenebras, caliginesque mira ac singulari luce discutit, atque involutas fraudes in medium diem producit. Quis ergo, nisi plumbeus plane sit; vel iniquus, Scholasticam Theologiam tantorum bonorum parentem fecundissimam ad rerum inutilium classem amandaverit, eamque silvescere & sterilescere permiserit? Itaque, ut hæc sacrarum literarum ac veritatis vindex acerrima, salva semper, incolumisque consistat, atque novum in dies

D

capiat



capiat incrementum, authores nos oppido sumus: tantum abest, ut Theologiam Scholasticam repudiemus. Quod volumus id unum est, Auditores, ne a rectis doctissimorum scholæ Principum vestigiis, Angelici præsertim, ac Seraphici Doctoris unquam deviet, & in abrupta se proripiat: ne frivolis & vanis quæstionibus rota quanta est se immisceat, ne in tricis, & nugis omne tempus infumat: ne denique quadam innovandi libidine nova commenta recudat, atque jis mordicus adhæreat. Hoc quidem volumus: quod non est Scholasticam Theologiam extirpare, sed purgare; non est ad vivum refecare, sed palmites inaniter luxuriantes præcidere, ut uberior cognitæ veritatis fructus ad maturitatem perveniat: non est, non est tandem Scholasticam Theologiam damnare, sed abusus in eam temere invecos corrigere. Quemadmodum enim in reliquis artibus, ut ut bene constitutæ illæ sunt, optima quæque non sano earumdem usu corrumpi aliquando contingit; sic quoque in hac omnium arte summa, imperiti vel intemperantis artificis vitio aut temeritate, ne id eveniat, verendum est. Quare Theologia terminis a majoribus sapienter constitutis optimo consilio finiri debet & circumscribi; quin etiam si temporum conditio id postulat, ad grandiore Sanctorum Patrum normam est revocanda. Atque utinam omnes, qui scholæ subsellia modo implent, Principes illos scholæ parentes præ oculis haberent semper, semperque eorum scripta sedula manu volutarent. O quam nitidam tractandæ Theologiæ methodum ab jis ediscerent; viderentque simul; ut illi, sicuti per ætatem licuit, nec  
a bo-

a bonis artibus, nec a quadam temperatæ, & castæ Eloquentiæ venustate, fuerint penitus destituti! Admirabilis quippe est lactea ac vere Angelica in divi Thomæ scriptis quæstionum dispositio ac connexio; dilucida, ornatæque, quantum materia patitur, elocutio. Neque his virtutibus caret divi Bonaventuræ rerum Theologicarum tractatio, quibus perpetuo addit ignitos quosdam divini amoris stimulos, vere seraphicos, ad legentium animos inflammandos. Lucet enim ejus doctrina, Gersonæ teste, & simul ardet. Quod si in philosophicis aliquando plus æquo expatiari videntur sanctissimi scholæ doctores; id tempori dandum, quo scribebant, atque adversariis, cum quibus eos congredi oportebat. Aristotelis, Avicennæ, Averrois, atque hujus farinæ Philosophorum placita tempestate illa apud omnes obtinuerant, & utramque paginam faciebant. Jis abutebantur ad fidei catholicæ dogmata labefactanda & libertini ingenii Scriptores, & Hæretici. Prudens ergo fuit scholasticorum doctorum; sapiensque consilium jisdem armis adversus hostes in certamen descendere, & proprio ipsorum ense Hæreseon monstra jugulare. Instituta a Patribus primorum sæculorum cum Græcis, tum Latinis summa cum sapientiæ ac prudentiæ laude hoc in negotio imitati sunt. Illi quippe cum Ethnicorum Gymnasia veterum Philosophorum, Platoniorum præcipue, decretis maxima famæ gloria eo tempore florent; suarum partium esse duxerunt eodem cum illis curriculo insistere, illorum axiomata convellere, argumenta falso inde deducta, falsissima esse demonstrare, nulloque modo rectæ ratio-

nis lumen , sacrarum literarum testimoniis , ac fidei nostræ dogmatis adversari . Quam ob rem nos , qui in isthæc tempora incidimus , quandoquidem post renatas meliori fidere literas , & erudita linguarum studia , & mirifica criticæ artis adjumenta , & universæ eruditionis prædites thesauri in omnes omnium culturarum gentium scholas sese liberaliter effuderunt ; nos , inquam , qui manus identidem conferere cogimur cum hostibus ; hisce copiis luculenter instructis ; atque literarum humaniorum & Eloquentiæ artificiis bene stipatis , in Scholasticæ Theologiæ subsidium , ( firma illa semper , constansque sit scholarum magistra ) harum rerum , universæque eruditionis præsidia arcessenda esse plane intelligemus . Utinam magnæ illæ animæ scholasticorum Principum ad vitales hæc auras modo redirent . Utinam in agone scholastico iterum dasudarent . Quanto præ nostra fortius , feliciusque illorum occuparetur industria ! Ut nullum ex his , quibus nos abundamus , adjumentis , in tanta librorum copia , typorum beneficio diffusa , in tam vasta , ac propemodum infinita eruditorum laborum suppellectile ; in tanta denique humaniorum literarum ac Eloquentiæ luce , ut nullum unquam sibi perire paterentur adjumentum ; quin omnia sibi avidissime arriperent : & mascula Eloquentia , & uberiori , laxiorique sinu Theologiam exciperent , & liberalius educarent ! O quales , quantosque vindices adversus vanam , mendacemque Hæreticorum eruditionem in jis haberet Ecclesia ! Habermus profecto in primoribus scholæ magistris redivivos Athanasios , Basilios , Nazianzenos , Chrysostomus , Hieronymos ;

Ambro-

Ambrosios, Augustinos, summos scilicet & Theologos & Eloquentes haberemus. Habemus tamen, qui pro virili sanctorum Patrum uberem Theologiam, politis ac nervosis scriptis aliquo pacto conantur exprimere. Non desunt, qui Patrum exempla secuti, probæ illius Eloquentiæ, omnigenæque eruditionis atque humaniorum literarum notitiam cum Theologica facultate ita conjungunt, ut nedum paribus, sed certe superioribus armis novatores collatis signis adoriantur, eorumque petulantiam egregie retundant.

Ad nos itaque excellentium horumce Theologorum hereditatem, & sacrorum studiorum imitationem pertinere nullus dubito. His ducibus scholasticæ Theologiæ brachia bonarum artium præsidio, quasi firmissimo umbone obarmemus oportet, ut acutis Theologiæ gladijs Eloquentiæ splendor, conveniensque nitor accedat.

Verum, audio quosdam aliter, atque ego sentio, post scenam obloquentes. Scilicet, inquit, Eloquentiæ blandimentis acutissima Theologiæ jacula hebetari debent atque obtundi? circumductis verborum periodis bene constitutum argumentorum agmen dissolvi quis ignorat? Superficie tenus illustria esse Eloquentiæ arma, at parum solida. Theologos, qui in hæc divagantur, eruditos quidem audire, sed parum in statione sua firmos; apparentibus ratiunculis ipsos delectari, non e fundo rationis evisceratis: propterea nec acutos esse, nec profundos. Hæc & similia blaterare solent homines jejunis syllogismis innutriti. Quin etiam summos, clarissimosque Theologos, quamquam & penitioris Theologiæ acumine & dictionis nitore, & Eloquentiæ vi, eos  
lato

lato intervallo antecellant, hoc ipso tantum nomine, quo eloquentes audiunt, ab omni prorsus affirmant profunditate, atque acumine in re Theologica destitutos: ac si literarum humaniorum, & Eloquentiæ exercitatio, res Theologicas pervidendi aciem prorsus obtundat, ac stupidos, hebetesque homines faciat. O distortum, perversumque judicium! Erigant illi aures, audiantque quid calumniis ipsorum reponamus: veram Eloquentiam non eam esse, quæ sita sit in nescio quibus argumentatiunculis, in nugis sophisticis, in puerilibus argutiis jam supradiximus. Illam veluti indivulsam sibi comitem rationem adsciscere, atque optimi instrumenti loco rationi artifici inservire, item diximus; fundamenta, basesque scientiarum metiri, acute argumentorum sedes ante perlustrare, etiam diximus, & centies inculcavimus. Quo pacto igitur obtundere poterit Theologicarum rationum acumen Eloquentia, quæ argutos, certosque, & nimis anxie circumscriptos verborum ambitus a Theologo non requirit, requirit autem, ne inconditas, dissipatasque sententias nullo prorsus verborum ordine scribat? Hac quidem sana Eloquentia qui pollent Theologi, & lima poliunt, & ad incudem revocant argumenta. Acuit igitur, non obtundit, coacervat scite, non dissipat incondite, ornat, non opprimit, in bona luce collocat, non obruit involucris Theologicas ratiocinationes sana isthæc ac virilis Eloquentia. Quanto hæc sint præ ceteris bonarum artium instrumentis illustriora atque uberiora commoda, quæ ab Eloquentia, universoque humaniorum literarum complexu in Theologiam derivant, plane vident,

vident, qui sapiunt. Sunt enim præclara hæc humanitatis studia nedum ad animi oblectationem pulcherrima, sed & ad defendendam, illustrandamque religionem nostram perquam necessaria. Quæ si attendissent homines humanioribus literis infensi, minus in arrogantiam offenderent, nec tantopere in acuta, ut ipsis videtur, barbarie perseverassent. Sed attendunt fortasse, Nihilominus tamen nescio cujus latentis invidiæ fumo obcæcati, animi oculos sponte claudunt, ne videant quanto in errore versentur. Nonnulli siquidem ex illorum grege sunt, qui, ut Terentianus Mitio inquit.

*Nihil rectum putant, nisi quod ipsi faciunt.*

Unde illam dumtaxat loquendi, scribendique rationem probant, quam se imitari posse confidunt. Hinc doctorum virorum disertæ, casteque ornata Eloquentia, ad cujus culmen contendere minime valent vel ingenii imbecillitate, vel reluctante natura, & laboris, & accuratæ diligentiae impatiente, semper ipsis & suspecta; & invisa. Non sunt itaque ab veritatis amore adversus Eloquentiam, humanioresque literas, quas in vulgus spargunt, quærulæ illæ voces non; habent alias, sive ab invidia, sive ab inertia, sive ab erroris pervicacia radices. Eloquentissimos Theologos oderunt, feruntque animo iniquo sicci isti & macie tabidi acuminum sectatores, qui, ut cum Tullio loquar, *certis quibusdam destinatisque sententiis & loquendi modis*, ab Sanctorum Patrum norma longe alienis, *quasi additi, & consecrati, ea sunt, quam altius imbiberunt, dura aliquando necessitate constricti*, ut etiam ea, *quæ non satis probare solent, cogantur pertinaciæ causa defendere.*

*dere* : Accedit alia hujusmodi opinionis origo : nonnulli ingenio suo aliorum ingenia metiuntur ; cum vero ipsi impares tanto oneri se cognoscant , ut æque gnawiter dent operam & eruditis , humanioribusque studiis ; & divinarum rerum solidæ meditationi , alios etiam id pro dignitate præstare non posse existimant : juratique asseverent ; viros celeberrimos ( ut belle desipiunt ) in tantos rerum , atque eruditionis campos longe , lateque distractos ; rationum momentis , & acutæ Theologicarum rerum indagini non posse constanter insilire . Ita est , ita est , Auditores . Hæc sunt nonnullorum perversa judicia : hæc illorum in viros doctos , ut sæpenumero experimur , Archilochica edicta . Proximo labente sæculo inventi sunt Theologi , si ipsis credendum , acutissimi , qui virum & dignitate , & Theologica doctrina , omnique optimarum artium laude eminentissimum , non alia de causa , nisi quia & rei chronologicæ , & multijugis eruditionis , & totius antiquitatis subacta scientia esset famigeratissimus , ex albo Theologorum censoria virgula expunxerunt , atque e sacra Doctrinæ subscillis per summam injuriam deturbatum ad Chronologos , ad Antiquarios , ad Grammaticos amandarunt . Hac ipsissima , ut plurimum , via incedunt quidam ejusdem fursuris , qui ingenio intra cancellos dumtaxat macræ speculationis adstricto , dolium unum volutare noverunt ; unoque in pistrino semper inclusi , in eo tamquam in Regno , sibi plaudunt , ac triumphant . Atque hanc cantilenam centies recinere solent : viris scilicet eloquentibus ac amplissima eruditione præditis in dorso studium esse , non in cerebro . O certe homines

cere-

cerebroſi, totique ab ingenio facti ! Grande nimirum ingenii argumentum ( liceat his ſcholæ phraſibus uti ) abſtractiſſimis, chimæricisque præciſionibus mentem ſurſum agere, omnemque dialecticum ſpiritum ex æquivocorum ſuccis exprimere, ut ſophiſticis argutiolis adverſarium circumvenias ac decipias ! Grande ingenii paradigma metaphyſicis eliquationibus ( ut de novitiis Pſeudomyſticorum commentis ſenſerat olim Jacobus Benignus Boſſuetus Meldenſis Episcopuſ, Theologuſ & doctiſſimuſ, & eloquentiſſimuſ ) metaphyſicis, inquam, eliquationibus reſ divinas, quaſi chymicorum igne ſegregare in aereas, vanaſque particulaſ, atque in novaſ formaſ tranſmutare ! Grandiſ ingenii labor ad amuſſim dialecticam duo, vel tria rationiſ momenta, & aliquando figmenta revocare ! Fac ut ita ſit. At nulliuſ ingenii labor fortaſſe erit ſacræ Scripturæ arcana perſcrutari, variaſ ſacri textuſ cum lectioneſ, tum verſioneſ conſulere : quæ falſo ab Hæreticis obtruduntur interpretationeſ, linguarum peritiâ expungere ? Nulliuſ erit labor ingenii Patrum ſcripta in ipſo Scriptorum fonte propiiſ, non alieniſ oculiſ legere : & collatiſ inter ſe manuſcriptiſ, editiſque codicibuſ, ſi quid luxatum ac depravatum, ope criticeſ integritati ſuæ reſtituere, genuina vero a ſpuriis ſecernere ; unde certam ad fidei deſenſioneſ argumentorum ſerieſ ſibi ſumat Theologuſ, atque omnia recto filo diſponat, & perſpicue, ornateque in lucem emittat ? Ita ne nulliuſ ingenii labor erit in Eccleſiæ caſtra tot, tantoſque com meatuſ importare ? & ſcholasticam Theologiam, quam, uti ducem, omneſ vere Theologi amant & profiten-  
E tur,



tur, subsidiariis, quibus hoc tempore indiget, copiis, adversus hæreticorum conatus communire? Bajuli ne vobis erunt hujusmodi Scriptores, non artifices? In dorso ne habent robustissimi istiusmodi Theologi studium, in cerebro non habent? Ita vos tantummodo sapitis: ita vobiscum sapiunt, qui desipiunt. Sed damus, inquirunt, perlibenter, eruditissimos illos dici: acutos autem dici pernegamus. Heus homines contentionis cupidiores, quam veritatis! Fieri fortasse poterit, ut tam magna eruditionis, Eloquentiæ, humaniorumque literarum copia acuminis laudem amittant? Nempe hebetes, obtusique apud vos erunt Athanasii, Basilii, Nazianzeni, Nysseni, Chrysostomi, Hieronymi, Ambrosii, Augustini, Aquinates? Hebetes erunt, qui hos acutissimos, eloquentissimosque Patres strenue his nostris temporibus sunt secuti? Hebetes erunt, ut sexcentos alios præteream, & Robertus Cardinalis Belarminus, & Gretserus, & Sirmondus, & Petavius, & Alphonsus a Castro, & Canus, & Bossuetus Melandensis hic, ille Canariensis Episcopus? Hi omnes de controversiis fidei optime meriti, acutissimi in Theologiæ Scholasticæ palæstra habiti sunt, quamquam illam semper cum Eloquentia, cum linguarum peritia, cum humanioribus literis, cum omnigenæ eruditionis cumulo, accerrimoque judicio summa laude conjunxerint. Quid restat igitur, nisi ut vos aberrare dicamus? Restat sane, ut vos præpostere acutos, subtilesque disputatores, divi Augustini Doctoris & acutissimi, & disertissimi in utraque palæstra, & scholastica & Polemica dictatoris, decretorio judicio permittamus. En, quo-

quomodo sanctus Doctor eodem vos , quo olim Julianum, divinæ gratiæ hostem, acutum item, & callidum e media ethnicorum philosophia disputatorem, fortissimo simul & eloquentissimo stilo impetat , atque confodiat. *Quæ vobis* ( sic adoritur magnus Ecclesiæ magister sophistas frivolarum ratiuncularum amatores. ) *Quæ vobis argumenta succurrent ? Quæ Aristotelis categoriæ ? Quibus ut in nos veluti artifices disputatores, in alios videri appetitis eliminatos ? Ubi est acumen vestrum, quo vobis videmini : & categoriæ Aristotelis affecutos, & etiam dialecticæ artis assuetiam ? Videte nempe, quam dialectice nihil dixeritis.*

Quæ cum ita sint, optime a nobis de re Theologica consultum erit, si illam eandem in sacris hiscè studiis robustam, copiosamque methodum, quam sancti Patres, virique de schola doctissimi probe tenuerunt, presso pede percurramus. Ut nimirum peractò Theologiæ Scholasticæ curriculo ( hanc enim egregie cultam in antecessu volumus ) res sacras adhibito & linguarum, & Eloquentiæ, rectè convenienterque temperatæ, atque omnis sanæ eruditionis subsidio, pertractemus : ne falso putemus nullum inter humaniores ; ac sacras literas, gravioresque disciplinas commercium intercedere : ne hac tempestate, tot tantisque virorum doctorum lucubrationibus locupletata, pristinam barbariem mordicus retinere, & in antiquitatis totius ignorance misere versari videamur : neve tandem bonarum artium jejunitatem in tanta illarum abundantia præpostere diligamus ; digni propterea, ut Tullianis verbis

E 2

argua-

arguamur , veluti qui *perverse post inventas fruges , glande vesci perseveremus .*

Lætor autem , ac summo gaudio perfundor , quum plurimos video sanioris Theologiæ magistros , qui adolescentum animos , flagrantes desiderio sapientiæ , eo perducere incipiunt , ut in tractandis rebus Theologicis ad limatissimam sanctorum Patrum doctorumque virorum methodum beatam illam , & copiosam , existiment esse regrediendum . Exstat , quem supra laudavi , doctissimi Mabillonii , cujus memoria in benedictione erit , liber de monasticis studiis , qui rerum sacrarum tractatoribus regiam plane viam sternit , cui maxima cum Theologici nominis commendatione utiliter insistant . Quam , qui sunt secuti ex ornatissima sancti Mauri familia viri celeberrimi eruditis laboribus & Patrum Theologiam , & ecclesiam illustrarunt hæcenus , & modo feliciter illustrare pergunt . Exstat item alterius de Patrum lectione tractatus Gallica lingua scriptus , qui præclara de hac re habet atque utilissima documenta : docetque prudenter quam sibi partem ex ampla Patrum lectione pro sua virili quisque sumat præcipue tractandam , ut juxta illud sapientis ingenii monitum , *videat quisque prius quid possit , deinde totum faciat , quod possit : nam si quo in genere plurimum potest , in eo magnopere adlaborat , egregium sibi opus relinquit .* Exsurgunt etiam hac nostra tempestate ex scholis Italiæ , quæ fuit semper ingeniorum fecunda parens , ac bonarum artium magistra , exsurgunt viri , qui cum sanæ Theologiæ , & omnis omnino eruditionis copiam politissimi stili ubertate , quæ Italorum semper  
inge-

ingeniorum gloria fuit, abundanter instructi, etiam in hisce sanioris Theologiæ studiis Italici nominis dignitatem tueantur: atque exteris Theologis, (qui quamquam semper de nostro creverint, & sua nostris fundamentis superinstruxerint, potissimum hoc in studio præ nobis regnare gloriantur,) & palmam eripiant, & ab his accepta facient meliora. Audio siquidem virum, egregium & religione, & doctrina insignem, qui Additiones & vindicationes ad Bellarmini Controversias prælo paratas habet, nonnulla de recta Theologiæ methodo adversus hæreticorum commenta eo in opere præfari: nec dubito, quin perspicue, & solide id perficiat vir doctissimus: habet enim ingenium geometricis institutis bene purgatum: habet locupletem totius eruditionis apparatus: estque omnium pene linguarum, quæ in variis sacræ Scripturæ interpretationibus vigent, callentissimus. Edidit quoque brevem quidem, sed melioris succi plenum Indiculum quorundam opusculorum sanctorum Patrum, ex quibus præcipua sacræ doctrinæ argumenta sibi derivent Theologiæ candidati; vir cum pietate, tum eruditione excellentissimus popularis meus, genere non minus, quam vitæ sanctimonia clarissimus. Hic sæpe mecum corruptam a quibusdam semidoctis apud nostrates tractandæ Theologiæ methodum vehementer indoluit: & ut est divinarum rerum assiduæ contemplationi, atque ecclesiasticæ Psalmodiæ addictissimus, ingenue affirmavit aliquando, se animum ad res sacras, divinasque preces rite peragendas magna cum difficultate colligere potuisse, si recens a ficcis, atque abstractis hujusmodi quæstionibus

ad

ad sacra accessisset ; secus autem , si a Patrum lectione surgeret , mentem minime distractam , voluntatem vero suavi quadam sancti Spiritus unctione inflammata ex-  
 periri : unde novam , uberioremque , non Indiculi fo-  
 lius , sed plenioris methodi tractandæ Theologiæ ad  
 sanctorum Patrum amussim expensæ editionem medi-  
 tatur vir doctus & pius , edito jam Institutionum Theo-  
 logicarum antiquorum Patrum tomo primo . Operis  
 frontem exornant Conciliorum ac Summorum Pontifi-  
 cum decreta de recte instituenda Theologiæ methodo ,  
 orthodoxis doctoribus præscripta . Igitur in horum viro-  
 rum sententiam eundum est , Auditores . Scholasticam  
 Theologiam a certis quibusdam vanis , ac super vacaneis  
 quæstionibus , quas maleferiata ingenia pro innovandi  
 libidine pepererunt , recte purgare , & pristino suo de-  
 cori restituere , oportet . Eaque , ut expedit , summo  
 cum honore , & utilitate apud nos retenta , atque in fi-  
 dissimam comitem assumpta , ad altiora sacræ doctrinæ  
 studia gradum faciamus . Id vero nos pro dignitate præ-  
 stare non posse , nisi humaniorum literarum , Eloquen-  
 tiæ , ac universæ eruditionis adjumenta fuerimus confe-  
 cuti , sane inficiabitur nemo . Haftenus hæc a me , &  
 satis forsitan prolixè , ut vel mihi videtur , demonstrata  
 sunt . Sed Theologiæ optimæ instaurandæ , exornandæ-  
 que desiderium , homini ab ineunte ætate Theologicis  
 institutionibus innutrito , de Theologia dicenti longius ,  
 quam par erat abrepto , nimis productæ orationis ve-  
 niam impetraverit . Nunc , ut instituimus , ordine ad  
 reliqua pergamus . *Alterum* est in quo aliquando opor-  
 tet , ut sacrorum studiorum occupetur industria ; Hi-  
 storix

storiæ scilicet ecclesiasticæ cognitio, & de rebus in Ecclesia gestis diligens, solersque tractatio. Hujus enim adminiculi necessitatem non ultimo loco ponendam esse a Theologo, uberiori calamo probarunt viri eruditi quamplurimi: quibus & nos symbolam addidimus, præfatiuncula de hac re edita, quum primum in Almo Augustæ Perusiæ Gymnasio Institutiones Ecclesiasticæ Historiæ publice prælegeremus. Ne igitur actum agere & rem diu inter eruditos vexatam, communique omnium calculo probatam retractare videamur, eam in antecessum positam volumus. Id unum modo videndum est; quam multa nimirum ad intelligendam, scribendamve Ecclesiasticæ Historiæ partem aliquam, humaniorum literarum atque virilis Eloquentiæ ratio suppeditet adjumenta. Suppeditat enim omnium rerum, quas Historia desiderat abundantiam, & copiam. Quibus si quandoque careret, nedum manca illa esset & vitiata; sed sæpenumero prorsus absurda, atque a veritate, sine qua nullo modo potest salva consistere, penitus destituta.

At quoniam singula persequi per tempus non licet, potiora rerum capita, ea, qua possumus brevitate percurramus. Non indiligens veteris, novæque Geographiæ constitutio; exactissima item Chronologiæ ratio in hisce studiis probe tenenda est, Auditores. Sunt enim hæc duo potissimum, veluti totius Historiæ lumina: sine quibus, sive historica legas, sive scribas, per cæcos, dubiosque anfractus incedas sine luce, ac sine duce: unde statim tota aberrare via certo certius tenseseris, ac multis erroribus implicari. Finge tibi diffiden-

dentes inter se Scriptorum sententias obversari, qui de loci alicujus natura, situ, aliaque hujusmodi circumstantia, ea scribant, quæ tenebras ostundant rerum gestarum narrationi: finge nodum valde implexum ex variis urbium ac regionum nominibus, quæ aliquando omonyma sunt apud Historicos, nulloque certo adjutorum charactere distincta, sed pene confusa; quæve novis superinductis appellationibus a veterum nomenclatura recesserunt; quid ages geographicis institutis vix a limine salutatis, si Dodonæo e luco nunquam profiliens responsa quidem & oracula fundas e tripode, ceterarum vero rerum ita sis rudis, ut in Æthiopia ne, an in America sit Mexicum ignores? Quonam te pacto ab hujusmodi nodorum coagmentatione feliciter extricabis, nisi suppetat totius Geographiæ exacta cognitio? Jam tibi Græca Messene, Meisana erit Sicularum urbium nobilissima: jam Siciliensem Megaram cum Græca ejusdem nominis commutabis: jam Cæsariæam Cappadociæ cum ea, quæ apud Palæstinos est: jam Forum Julii Galliæ Narbonensis cum ejusdem nominis Galliæ Transpadanæ Colonia; jam Faliscos Etruriæ Suburbicariæ cum Faliscis Chalcidensium Colonis in Magna Græcia (ut nuper accidit): jam totam demum Africæ sacre geographiam cum recenti scholiaste epistolarum synodali inter Augustinianas, imperite miscebis. Jam tibi Ephræm Theopolitanus Antistes, Diaconus erit Edeffenus, & cum famoso magnorum nominum obtrectatore tres homines, nempe Aimoinum Sangermanensem, alterum Aimoinum Floriacensem, & hujus interpolatorem anonymum in unum conflabis.

Sed

Sed quid plura confector ac colligo? Omnium una vox est doctorum virorum firmata consensu, cæcam penitus esse sine Geographiæ luce Historiam. qui vero ad eam accedunt sine illius ductu, nec oculos in fronte habere. Nunc vero dicant, quæso, humaniorum literarum contemptores; qui fieri poterit, ut rem geographicam, ab Græcis, Latinisque scriptoribus olim traditam, a viris doctissimis secundis postea curis multiplicis eruditionis ope illustratam, diligenter ipsi percipiant, ne libatis quidem mitioris literaturæ rudimentis? Profecto ab humaniorum literarum ac linguarum subsidio destituti, aut multa, ne dicam omnia, perversè accipient, aut ne vix quidem intelligent. Eodem hærrere turpiter luto illos videmus, & quandoque in pejus labi, qui rectæ Chronologiæ regulas ignorant. Nam quomodo Fastos Consulares, Imperii & Pontificatus initia, & persecutionum, & præcipuarum rerum in Ecclesia gestarum exordia exitusque, certis, finitisque periodis comprehenderint; ut quo tempore coacta generalia, ac celebriora provinciarum Concilia fuerint; quibus Romani Imperii Principibus, quo anno, qua die Martyrum Passiones inciderint, certo definiant: si quid vero dubium, implexumque sit, ad stateram veritatis appendant? Quonam filo ex infinitis propemodum ac Labyrinthæis ambagibus, quæ temporum perturbata ratione sine termino nectuntur, libero pede evadent unquam homines imperiti, quibus libratæ Chronologiæ præsidia non præsto sint? Veterum anachronismis suos adjungent, & quidem sædiores. Martyres, qui nusquam ac nunquam fuerint in medium

F

addu-



adducunt. Vere pro Religione passos, vel ex albo Sanctorum expungent, vel pseudo martyribus hæreticorum in unum confundent. Quæ sub Diocletiano, exempli causa, acciderunt, sub Decio vel sub Gallieno collocabunt. Præcipua ecclesiasticæ Historiæ capita metachronisimis deturpata, hæreticorum ludibrio exponent. Veterum Patrum monumenta longe alieno ab eo, quo signanda sunt tempore, notabunt, uti evenisse scimus, crasso factori, qui nuper literas ab Dionysio Alexandriæ Episcopo, imperante Gallieno datas, ad Deciana tempora ineptissime revocavit. Cui non risum moverit Theologus ille doctrinæ temporum imperitus, qui cum argumento premeretur, petito ex Concilio Florentino de processione Spiritus Sancti, sibi perfricuit frontem, ac divum Thomam eum Concilii locum pro se ipso interpretatum, fuisse pronunciavit. Perbelle scilicet ac præclare, quum divus Thomas seculo sesqui altero Concilio illi antecesserit. Audacia & inscitia huic omnino similem se prodidit nudiustertius miles ille gloriosus, qui ut suorum plagiorum turpitudinem excusaret, in criminis socium trahere tentavit magnum Platonem, quem scriptis suis Menandri versus, suppresso nomine auctoris, inseruisse affirmavit, quum tamen Plato longo tempore ante Menandrum floruerit. In summa, ut omnia susque deque verterint, ac maria terrasque miscuerint qui sine humaniorum literarum ac linguarum peritia, (qua una totius Geographiæ, ac Chronologiæ instituta probe intelligere possunt) legendæ, scribendæve ecclesiasticæ Historiæ non lotis, ut ajunt, manibus, potestatem temere sibi tribuunt! Porro quid dicam de altero

Histo-

Historiæ præsidio minime contemnendo, quod ex totius antiquitatis notitia promanat luculentius? Quid enim vetusta Regum Pontificumque diplomata? Quid manuscriptorum codicum arcana supellex? Quid numismata vetera & Græca, & Romana? Quid supremi, ac medii ævi inscriptiones, obscurissimis aliquando Historiæ locis, quid, inquam, non conferunt lucis? Sane, ut Polyhithor ille eruditissimus scribit, *Nummi (addam ego & lapides) interdum plus loquuntur, quam ipsi Auctores, & representata in jis picta & insculpta rerum publice gestarum & Antiquitatum Historia, rerum harum indagatores mire juvat, & ad perfectam Historiæ totius cognitionem facillime ac tutissime conducit*. Sed quibusnam labris mutos hosce testes legent? Et quam intelligentiæ clavi hosce thesauros recludent unquamji, quos humaniorum literarum, linguarumque solertia destituet? Hæc ita perspicua sunt, Auditores, ut ea cordatis viris solum indicasse sit satis.

Ad criticen modo considerationem intendamus. Etenim Antiquitatis studium, & critices exercitatio, quam maxime inter se cognata sunt, & mutuam sibi lucem commodant. Hæc ars plane mirabilis, quæ veluti sepes est bonorum auctorum, atque totius cultioris literaturæ, mirum in modum ecclesiasticæ Historiæ operam suam locat, ac difficillimis sæpe, desperatisque rebus præsens affert auxilium. Norunt eruditi quam vastus, quantusque sit criticæ artis usus, in dignoscendis, ac dijudicandis omnis generis auctorum, Græcorum, Latinorum, sacrorum, prophanorumque scriptis,

in castigandis, emendandis; ac restituendis jisdem; & quæ alia artis exquisitissimæ munia sint: norunt identidem ji, qui sine criticæ artis adjumento, confusa omnia, miserrimis imposturis plena fore animadverunt. Hujus enim beneficio, ne pro legitimis adulterini supponantur fœtus, egregie efficitur: quæ res in Historia primas habere partes debet, quum nonnisi a veracibus, probatisque testimoniis, Historiæ, præsertim sacræ, veritas petenda sit. Propterea tota quanta est in hisce studiis, doctorum virorum ita hætenus insudavit diligentia, ut jam nullum pene sit, neque tam obvium, neque tam reconditum veterum monumentorum genus, quod justis criticæ artis ponderibus per hæc tempora acutissimorum hominum ingenia non graviter examinarint. nam qui secus fecerint, quam turpiter lapsi sint, sæpe dolumus. quot enim falsa magno cum veritatis detrimento in ecclesiasticam Historiam invexerunt? Quot & Sanctorum gestis, & Martyrum actis figmenta incrustarunt? Quot veterum Patrum genuinis scriptis suppositicia ac fictitia assuerunt? Res a sanctissimis & doctissimis viris post Gelasium Romanæ Ecclesiæ Pontificem dudum animadversa jam satis de se loquitur, Auditores, atque in enumerandis eorum erratis tempus me citius, quam oratio deficeret. Erit item locus quum nostras disputationes de recto usu rationis in applicandis criticæ regulis in lucem emiserimus, ubi hæc fusiori oratione retractemus. Interea hujus criticæ artis, æquæ & rectæ quidem, non temerariæ, non irreligiøsæ, non inverecundæ, adjumenta omnia complexu teneant oportet, ut ex eodem, ne quid absit, qui eccle-

ecclesiasticæ Historiæ lacunam commodum explere in votis habent. Quare & humaniorum literarum, & totius mitioris eruditionis facultatem, qua criticæ artis intelligentiam consequi possunt, sibi comparandam esse certo sciat qui veneranda ecclesiasticæ Historiæ monumenta rectis oculis inquirere, aut accuratissimis consignare literis cum utilitate desiderant.

Ne vero quidquam ad institutum nostrum maxime faciens intactum, indictumque relinquamus, pauca hic de perpoliando stilo in scribendis Historiæ ecclesiasticæ documentis leviter delibemus; reliqua, ubi, Deo dante, de Historiæ artificio sermo erit, fusius tractaturi. Etenim quamquam jis, qui res in Ecclesia gestas privatos in commentarios referunt, ne majorum dicta, factave posterorum memoria dilabantur, rudi quodammodo ac simplici dicendi genere, libenter demus, ut scribant; jis tamen, qui res easdem leviter ab aliis adumbratas e. scriniis antiquitatis eruunt, atque in publicam lucem non jisdem verbis, nec commentariorum, sed Historiæ nomine insignitos emittere satagunt, ut ruditer scribant, minime concedendum putamus. Quemadmodum enim pictor imaginem, quam domesticos inter parietes leviter in tabella adumbravit, nonnisi scite expolitam postea, & superinducta primis lineamentis egregia forma, & quam rudi penicillo tetigerat, omnibus suis coloribus graphice descriptam, populo spectandam exhibet: ita ecclesiasticæ Historiæ Scriptor quæ ex aliorum commentariis prima, ut dici solet, falce dolata excerpserit, ea, si quidem publicæ luci exponere statuit, lima poliat ac decenter exornet.

Non

Non illam tamen usurpet dicendi formam, qua Romanenses fabulas calamistris inurere, fucisque ac pigmentis ad nauseam usque colorare solent otiosissimi Scriptores, quibus ludicra quædam dictio veterum eloquentissimis inaudita penitus, atque invisa, in deliciis est; sed casta ac pudica elegantia historiam scribat, ut historiam decet, eumque dicendi morem teneat, quem gravissimi rerum ecclesiasticarum Scriptores magna cum laude sectati sunt. Fateor ingenue, Auditores, nunquam ad magni Baronii Annales oculos convertere soleo, quin effulis præ gaudio lacrymis iterum atque iterum, eos veneratus exosculer, & nitidæ & puræ, & sobriæ, & elegantis dictionis caltimonium, gravemque simul ac concinnam rerum gestarum narrationem, propria & ad libram expensa suavitate conditam: quæ talis, tantaque est in spissi & subacti laboris opere, ut ab invitis adversariis meritas laudes extorqueat. Æque vero mihi stomachum, bilemque movent & comptuli illi, affectatique Scriptores, qui in antithetis ac frigidis argutiolis, ut plurimum ludunt; qui quasi meretricia cerussa, sibiioque sacræ historiæ faciem deturpant: tum & illi etiam horridi, hirtique sarcinatores, qui contra, omnibus perturbatis atque confusis, nullo verborum delectu, nullo dictionis nitore res clarissimas non jam edere, sed vomere, non scribere, sed inquinare videntur. Ecquis unquam patienter legerit Sanctorum virorum res præclare gestas, tam inquinate, tam sæde descriptas? Fac hujusmodi de vitis sanctorum Scriptores ad purissimam, latinissimamque phrasim Cornelii Nepotis non accedere, id vitio eis non vertemus.

temus. Sed barbare, sed incondite, sed lutulenter fluere, sed solæcismis plerumque scatere, atque singulis promodum paginis turpissimos in errores eos impingere non miti animo tolerabimus. Sed hujusmodi miseros chartarum conspurcatores ad Orbilios, ut puerorum ferula plectantur, amandabimus. Aliud est, Auditores, purum ac simplex, & vere ecclesiasticum dicendi genus; & sacræ Scripturæ autoritatibus, congrue & suo loco positis, veluti sale optimo inspergere; & veterum Patrum sententiis ad rem facientibus, quæ legentium animos ad virtutis amorem inflamment, scite tamquam stellulis quibusdam illuminare & distinguere: aliud vero compilatis sacrorum codicum, sanctorumque Patrum scriniis illorum sententias sine iudicio corrasas hac illac infarcire, putidosque, ac male futos centones conderé; ut non optime depictam rerum gestarum narrationem, sed mulivum quoddam opus, & texellatum ex variis, pretiosis quidem, sed pessime inter se cohærentibus, lapillis inepte compingere, & agglutinare. Vellent, fortasse rhapsodi isti interpolatores quorundam sanctorum Patrum, Bernardi præsertim, qui hoc in studio palmam ceteris præripuisse videtur, aureum ac pium dicendi genus spissa, sed concinna sacrarum Scripturarum temperatione coagmentatum imitari; at quum ad id minime contendere possunt, sanæ Eloquentiæ, rectæque imitationis præcepta ignorantes, cacozeliæ vitio laborant, & simiolas ridicule repræsentant. Hæc igitur antequam ad scribendum animum advertant, probe intelligant, oportet. Si vero secus a natura, atque ab arte comparati sunt,

ne

ne audeant, quæso, manibus a ferula nondum subductis, enormia exarare volumina librorum, quos quis unquam legat? Unus, vel duo, vel nemo. Nemo profecto, qui sapiat. *Lectio enim*, ut Tullius inquit, *sine delectatione negligitur*. Quum ergo quidquid literis mandatur, id commendari omnium eruditorum lectioni deceat, ( quod fieri nequit, neglectis Humaniorum literarum & Eloquentiæ præfidiis, ) qui res in Ecclesia gestas, sanctorumque virorum acta accurate, luculenterque consignare literis cupiunt, ji profecto, quam sint necessaria ad id muneris exequendum mitioris literaturæ studia, tandem aliquando cognoscant, ac desipere, nugarique desinant.

At ne diutius vos demorer, Auditores, jam reliquum, supremumque attingamus Eloquentiæ verticem, quo me jamdudum tacita vestra expectatio vocat, & quo tandem aliquando ad exitum vergens mea festinat oratio. Etenim quamquam eos, qui aut rem Theologicam in scholis tractant, aut adversus heterodoxos pro ea decertant, aut res in Ecclesia gestas literis mandant, exquisito & exacto literarum humaniorum atque Eloquentiæ præsidio minime se indigere putent, utut falsum putent, venia quodammodo donari posse arbitremur; illos tamen omnino fugit ratio, qua erroris sui defensionem suscipiant, qui sacri oratoris munus, hisce studiis neglectis, cumulate se consequi posse confidunt. Non negamus profecto, Auditores, tam arduum, tam sublime, divinumque munus, quod Prophetarum, Apostolorumque munus est, quod in Ecclesia tunc recte perficitur, quum in ferendis virtutibus,

bus, atque in evellendis ab audientium animis, pravis, si quæ altius hæserint, vitiorum radicibus, summa cum utilitate versatur; simplici quandoque ac nudo verbi Dei sono, intus fonante veritate, quæ humanæ artis adminiculis nullo modo est alligata & dignius & fructuosius ab viris vere Apostolicis ac divinitus illustratis fuisse tractatum. *Spiritus enim ubi vult spirat & vocem ejus audimus. sermo vero Dei efficax & omni gladio ancipiti penetrantior* & mentes illuminat & animos pervadit; atque triumphatis affectibus, arcana quadam, potentique delectatione & ducit quo vult, & unde vult deducit perduelles ac refractarias hominum voluntates. Atque utinam omnes, qui ad id muneris assumuntur, in sublimi illa ac cælesti æternæ sapientiæ schola, mirabili hac via divinus ille præceptor erudiret! Utinam sanctitate morum, pietatis studio, ac precandi fervore cælestem sibi semper in dicendo derivarent divini verbi efficacitatem sacri ac Christiani oratores! Merito ac jure humana eloquentia prorsus obmutesceret, ac divini eloquii triumphos tacita admiraretur & coleret! Nihilominus, quoniam Dei Optimi Maximi providentia humanis ut plurimum adminiculis rerum naturæ congruentibus nos recte uti constituit, jam qui a Deo vocati sunt, (id enim tamquam hujus ministerii fundamentum semper præjectum volumus) ea sibi adsciscant oportet, quæ ad perficiendum optimum in hoc sacro dicendi genere oratorem perquam necessaria sunt. Horum numero probæ, pudicæ, grandis, masculæque præcepta ponimus Eloquentiæ. In quam sane sententiam & regulæ & exempla, a

G

fan-



sanctis Ecclesiæ Patribus tradita . nos maxime ducunt .  
 Quid enim , ut de ceteris fileam , toto de doctrina Christiana libro quarto contendit magnus Aurelius Augustinus ? Nil profecto aliud , nisi rectissimis castæ Eloquentiæ præceptis sacros oratores imbueret ; ut inde pateat quam falsus sit Anonymus ille , alias de Augustino bene meritus , qui in præfatione Gallicæ interpretationi sermonum sancti Doctoris affixa , omnem omnino Eloquentiæ artem , Augustini autoritate a sacris oratoribus arcendam esse opinatur : cujus falsæ opinionis radices forti brachio excutit more suo doctissimus alter Anonymus , editis de hac controversia solidissimis animadversionibus , ita ut non nisi rationis expertibus errorem suum absurdæ sententiæ defensor incutere possit . Legant qui volunt laudati Anonymi libellum : legant Francisci Panigarolæ Astensis Episcopi quæstiones , quas ecclesiasticas vocavit vir eloquentissimus , & libro de sacro Oratore instituendo præmisit . In iis profecto invenient , qui legerint , quidquid desiderari possit , ut Eloquentiæ artificium in sacro oratore necessarium defendatur . Namque illi etiam , qui contra stare videntur , quum non nisi eloquenter Eloquentiæ causæ adversentur , hujus florentissimæ artis necessitatem adstruunt , tantum abest , ut destruant . Et tandem nescio , an eloquentius quispiam causam Eloquentiæ defendere possit , ac divus Hieronymus facit eo ipso loco , quo ad Damasum scribens , ab interpretationibus sacrarum Scripturarum illam conatur eripere . sic enim rationem suam conficit : *sed de Scripturis disputantem non decet Aristotelis argumenta conquirere , nec ex flumine Tul-*

Tul-

*Tullianæ eloquentiæ ducendus est rivulus: nec aures Quintiliani flosculis & scholari declamatione mulcendæ. Pedestris & quotidiana similis, & nullam lucubrationem redolens oratio necessaria est, quæ rem explicet, sensum edisserat, obscura manifestet; non quæ verborum compositione frondeat. Sint alii disertî, laudentur, ut volunt, & inflatis buccis spumantia verba trutinent; mihi sufficit loqui, ut intelligar, ut de Scripturis loquens & disputans, Scripturarum imiter simplicitatem. Hactenus ille: quibus sane eloquentissimis verbis non omnem oppido Eloquentiæ artem repudiat, sed, aut ego fallor, rectum in exponendis sacris Scripturis in didactico, aut catechistico dicendi genere, simplicioris Eloquentiæ usum terminis suis præfinit: nimis artificiosum dicendi genus, ac rerum tractandarum naturæ minime accommodatum, & affectate conquisitum, quo nullum majus in sacro oratore vitium, sanctus Doctor exhibat. Paræneticum vero dicendi genus omnibus Eloquentiæ nervis recte constitui docuit vel exemplo suo ipse Hieronymus. Restat igitur, ut Eloquentiæ usum teneamus, abusum reprobemus: quo fit, ut necessario addiscenda esse a sacris oratoribus Eloquentiæ præcepta nemo sanus inficias iverit. Usus autem sublimis, castæque Eloquentiæ ille erit, quem vel in sacrarum literarum Scriptoribus invenit, & laudavit Augustinus: *nam eos habere quidem, inquit, at non ostentare Eloquentiam; quæ talis, tantaque est, ut nemo eorum, qui Eloquentiæ ornamentis instantur, qui linguam suam, sacrorum Scriptorum linguæ, non magnitudine, sed**

*sumore præponunt ; aut sapientius , aut eloquentius unquam dixerit .*

Igitur hæ firmæ, ratæque leges sint apud Christianos oratores . Emineat in sacris eorum orationibus grandis Eloquentia , sed quæ ostentationem fugiat , & divinæ sapientiæ indolem sapiat : habeat quandoque inaffectedatam quandam verborum atque ornamentorum negligentiam ; quam in politico sublimi dicendi genere commendat etiam Longinus ; ne matronæ gravitas in comptulam adolescentulæ venustatem degeneret . Singula loco suo scite disponat , ut divini verbi castimoniam redoleant ; ut res sacras non plus justo exornet , nec laciniis infarciat alienis . Sua a divinis testimoniis argumenta deducat , ac Patrum sententiis illustret . Vera dicat , non vana . Profanas & vocum , & rerum novitates evitet : non verborum strepitu blateret , sed forti quadam , ac dulci suavitate se in audientium animos insinuet : non luxuriet in folia , sed mature scat in fructus . Nunquam in summa a recta ratione deviet , perpetuamque sibi comitem copulet uberrimam ac robustissimam sacrarum Scripturarum & sanæ Theologiæ doctrinam ; ut secundum illud Reginæ Eloquentiæ edictum , quod a Tullio mutuatus est Augustinus , *ita dicat , ut doceat , ut deleat , ut flectat , ut vincat* . O præclaræ , sanctissimæque leges , quas & natura ipsa , & recta ratio condiderunt ! His profecto legibus finitam ac comprehensam ad explicandas populis nostræ religionis veritates , ad corrigendos corrupti sæculi mores , sancti Ecclesiæ Patres , ac probi rerum sanctissimarum tractatores Eloquentiam in sapientiæ consortium admi-

admiserunt . Inde nata est illa eloquentissimorum Patrum divina facundia , quæ omnibus disciplinis egregie instructa , ad sacri oratoris munus accessit , quæque sumptis a profanis Scriptoribus , summo judicio ac prudentia , præfidiis caste uti atque apposite summa cum audientium , tum dicentium utilitate consuevit . At proh dolor , ut hæc sublimissima , sanctissimaque Eloquentia per hæc nostra tempora stetit & obmutuit ! Quam indigna homine christiano , quam male respondens rerum divinarum majestati , non jam dicam facundia , sed insipiens quædam loquacitas subsecuta est . Hæc siquidem levia ac frivola paucissimè tractat argumenta . Putidissimas argutias , ineptissimas verborum antitheses , sædissima metaphorarum portenta , declamatorias dicendi formulas unice amat & avidissime confectatur . In flosculos pessime olentes , ac in laxas fabularum lacinias , petulantissimi oris volubilitate contortas tota quanta est se diffundit . Non ad animos conciliandos movendosque solidis rationibus atque affectibus æque effervescentibus infundat , sed lenociniis illita aurium studet voluptati . Bone Deus ! quis unquam sine stomacho audire poterit tot , tantasque historiarum , ut plurimum apocrypharum , ac fabularum farragines in sacras orationes tam intemperanter injectas ; ut vix , ac ne vix quidem , inter Herculis , Jovis , Mercurii , Veneris , Adonidis spurcissima nomina , venerandum nomen Jesu distinguere liceat aliquando ? Quis sine indignatione tulerit , ut sacerdotes divinæ legis antistites histrioniam agant , & de nostræ Religionis mysteriis , tanquam de scena mimice differant ? Homi-

num

num scelera adversus Dei majestatem patrata , non forti brachio ipsos excutere, sed comiter iis adblandiri, ut non lacrymas, sed risum moveant, quis æquo animo tulerit?

*O facinus multo lictore piandum !*

*Ipsemet, æterni spargit qui semina verbi,*

*Infelix lolium, vacuasque immiscet aristas :*

*Dum studet argutis reprehendere crimina labris.*

At undenam erupit hæc perversa dicendi, non ratio, sed insania? undenam ventosa isthæc, & tautologiis hac illac perfluens in sacris orationibus stultiloquentia? Ita est, ita est, Auditores, ab sanæ Eloquentiæ ignoratione mala hæc proficiscuntur. Hujus divinæ facultatis præexercitamentis homines linguæ volubilitate & ingenio alioquin fervido, sed minime subactò predicti, vix, ac ne vix quidem, delibatis, putida locorum communium tractatione ac miserrimis illis vulgariis amplificandi modis, dum falso putant eloquenter scribere, eo deveniunt, ut verbosius insaniant. Magnum ac profundum veræ Eloquentiæ artificium nullo modo assecuti, corticibus hærent, & externis dumtaxat non tam utuntur, quam abutuntur ornamentis. Quæ utinam penitus ignorassent sacræ Eloquentiæ corruptores: non tot, tantaque damna in Ecclesiam intulissent. Etenim, Auditores, plus timendum est mali a quibusdam semiebriis, quam a plene vino sepultis; hi siquidem somno penitus opprimuntur, nec aliquid in aliorum perniciem moliuntur; illi contra cum nec satis expeditum habeant nec penitus impeditum cognitionis usum, in eo quasi rationis subobscurò crepusculo, ut male agant vident, ut recte, non vident. Itaque ji, qui  
nul-

nullam Eloquentiæ artis intelligentiam sunt consecuti, natura duce loquuntur, ut possunt, sin minus, tacent prudenter: qui vero dimidiatæ, ac falsæ Eloquentiæ compotes facti sunt, dum solidum divinæ facultatis artificium se probe tenere putant, ea furunt infania, ut male loqui nusquam & nunquam desinant.

Utinam igitur scioli isti declamatores, qui rerum divinarum ac sacræ Theologiæ scientiam cum rectæ Eloquentiæ laude, ut par est, conjungere non possunt, vel semper tacuissent, vel grandia ac fortia sine ullo elocutionis artificio argumenta tractassent! Staret adhuc simplex illa dicendi vis cum christianæ pietatis affectu, cum sanæ rationis ac Theologiæ doctrina conjunctissima. Rudis fortasse illa esset, incompta esset, barbara item in verbis esset, sed sensa haberet utilissimis documentis referta ac divino spiritu plenissima; quibus illa esset & ad vitia extirpanda, & ad serendas virtutes paratissima. Viverent adhuc bona illa ingenia, quorum, Augustino teste, *insignis est indoles, ut in verbis verum ament, non verba: atque separatis a sacris orationibus locorum communium nugis, res cum re, ratio cum ratione confligeret*. Non quidem neglecto sententiarum pondere, verborum dumtaxat inanis ornatus in pretio esset. Malle enim Christiani oratores debent potiori jure, quam Cicero, *indisertam sapientiam, quam stultiam loquacem: ac nullo modo, ut laudatus Augustinus docet, nobis sonare debet disertæ quod dicitur ineptæ*. Sed modo satis querelarum adversus hosce divini verbi depravatores. Eos fortasse, si Deus & otium dabunt atrociori stilo iterum, sed nun-

nunquam pro merito satis, confodiemus. Interea qui tanquam in vigilia quadam senatoria stant Christiani gregis Pastores, & Ecclesiæ Antistites hosce indignissimos mimos sacris rostris perpetuo interdiciant. Pii vero ac cordati Auditores eo supplicii genere plectant hosce nebulones, quod in eos eloquentissimus, & vere Apostolicus dicendi magister æquo jure constituit: ut nimirum vel nullus eis dicentibus plaudat: vel eos audiat nullus. Nunc ad institutam perfecti oratoris Christiani disciplinam revertamur. Magnum est quoddam opus, Auditores, atque haud sciam, an de humanis operibus longe maximum, sacrum oratorem agere numeris omnibus absolutum. Quippe qui audientium animos aut docere, aut dedocere, aut reprimere, aut incitare debeat; & modo ad vitia fugienda, modo ad sectandas virtutes contorquere. Id autem veris, non fucatis; solidis, non frivolis; grandibus, non puerilibus argumentis efficere, quanti laboris erit, quantæ artis! Oportet igitur in primis, ut & sacrarum Scripturarum loca & sensa probe teneat: ut sanctorum Patrum sententias verset, assidueque volutet quæ de mysteriis nostræ religionis, de vitiis, de virtutibus sana docet Theologia. Hinc suas rationes deducat, hinc deductas confirmet. Oportet insuper, ut disponendorum argumentorum viam, & rerum puris ac electis verbis scite exornandarum artem apprime calleat: ut concinnam figurarum varietatem ad animi motus, affectusque sedandos, excitandosque factam, mira solertia versare sciat: & quod caput est, ita callidus artifex sit, ut artificium ostentet nunquam. Nam recte dicebat ille summus quidem

dem sacrae elocutionis & grandis Eloquentiae magister, magnae spei adolefcenti, cui iste nihil, siue a natura, siue a doctrina defuturum aliquando praesentiebat, & quem modo tam egregium praepceptorem cumulatius exprimere videmus, deme fili, deme a sacris orationibus vana, deme supervacanea, deme vel pulchra: quae etsi nitore quodam alliciant, tamen dum nimis anxiam artificis industriam detegunt, argumentorum vim quodammodo enervant & infirmant. Meminerint propterea sacri oratores, ut nunquam sententiarum pondera ab dictionis involucro sejungant: ut non solo verborum numero, sed rebus aequae & verbis apte dispositis efflorescat & sobrie redundet oratio. Quae, ut bene Tullius monet, *nisi subest res ab oratore percepta & cognita, inanem quandam habet elocutionem, & pene puerilem*. Haec sunt, Auditores, verae ac sacrae Eloquentiae casta ac pudica ornamenta, quae non nisi ab Eloquentia magistra, atque ab eloquentissimis doctorum virorum lucubrationibus peti possunt.

Legendus itaque est assidue, seduleque volutandus sacrarum Scripturarum codex: legendi sanctorum Patrum libri, qui sensus divinorum eloquiorum eleganter, nitideque explanant: legendi praecipue inter eos, qui praelarius Eloquentiae laude floruerunt. His accedat subacta praepceptorum Eloquentiae intelligentia. Demetrii Phalerei, Hermogenis, Quintiliani, Tullii praesertim & Aristotelis de arte rhetorica institutiones non semel volutandae. Longini vero tractatus de sublimi genere dicendi, quem variis, doctisque notis ornatum nitidissime edidit Jacobus Tollius, pene memoriter ad-

H

discen-



discendus . Demum , quæ in laudatos Eloquentiæ præceptores exstant doctissimorum virorum, quorum magna nomina apud eruditos, animadversiones, & commentaria non segniter expendenda . Hosce purissimos, limpidissimosque fontes consulere oportet, non rivulos quosdam conlectari, nimis aliquando sicce, aliquando vero lutuenter ab jis derivatos . Nec operam suam male locatam sciant hujus divinæ facultatis candidati, si temporis aliquid infumant in legendis jis, quæ tum Ludovicus Granatenfis, vir & pietatis & doctrinæ, & sacre Eloquentiæ fama celeberrimus, tum Valerius Cardinalis, Veronensis Episcopus de Rhetorica, speciatim ecclesiastica scripserunt. Agmen vero claudat, quem semper præ manibus habendum esse prædico, sæpe a me laudatus, sed nunquam pro merito satis, aureus sancti Patris Augustini de Doctrina Christiana liber. Quum vero eadem sit (si argumentum excipias) & sacra oratoria & civilis: atque jisdem præceptis, quæ quidem a natura profiscuntur, utraque intructa confurgat; non minori diligentia animum referre liceat ad legendos quum Græcorum, tum latinorum præcipuos oratores, qui in civilis Eloquentiæ palæstra palmam ceteris eripuerunt . Quapropter sæpe numero ante oculos obversentur & maximus inter Græcos oratores Demosthenes; & ejus inter latinos æmulator Tullius; duo scilicet totius Eloquentiæ omnium doctorum virorum suffragio facile Principes: quorum ab imitatione etsi tantum absumus, ut ne admirari quidem, aut satis intelligere illorum Eloquentiam possimus; non parum tamen ab illorum assidua lectione, sacra hæc nostra dicendi ratio, quæ sublimiorem habet subjectam mate-

materiam ; non parum inquam , sed plurimum , quo ad explicandi modum , percipiat adjumenti . Habent enim in his duobus sacri oratores , qui grande præsertim dicendi genus tractant , hujus magnificæ dictionis exempla , quæ frustra alibi quæras , singularia atque omni ex parte perfecta . Quos si efficere poterunt , ut imitatione effingant , veterum Ecclesiæ Patrum & Græcorum , & Latinorum beatissimam facundiam prope est ut effingant .

Nam si quis a natura ita comparatus sit , ut in sacris orationibus conscribendis strictam ac concisam dicendi formam , nervoseque vibratam amet , præsto illi erit fortis ac fervens Demosthenis character , grande hujusce imitationis exemplar : *est enim Demosthenes* ( ut acute Longinus observat ) *prærupta sublimitate strictior , & concisior ; at cum vi , celeritate , robore , vehementia animi denique , cuncta inflammet simul ac abripiat , illum procelloso cuidam turbini , vel fulmini recte comparaveris .* Quod si fufum , ac circumductum dicendi genus arridet , omnia sublimi quadam majestate , prout libuerit , versans , atque undique triumphans , ecce tibi quamplurima magnificæ hujus notæ ac granditer copiosæ illustria specimina ubertim Tulliana suppeditabit oratio : *est enim Cicero* ( quod fuit incorruptum acutissimi inter Græcos critici judicium ) *magis fufus , quam Demosthenes , utpote qui , veluti longe lateque serpens flamma , cunctaque depascens , & post multos gyros atque ambages in se semper revoluta , quum copiosum habet ignem , tum qui perseveret , partitisque vicibus nunc hanc , nunc illam materiæ partem corripiciens , non ante cesset , quam cuncta absumpserit , seque ipse expleverit , atque satiaverit .* Hos

itaque tota mente, omnique animi contentione intueri oportet, Auditores, atque eorum virtutes sedula imitatione complecti. Horum quamdiu apud oratores sacros manserit imitatio, tamdiu sublime dicendi genus vixerit. Et sane Tullianum istud ac Demostheneum dicendi artificium, mira prudentia & christiana pietate atque doctrina temperatum post tot, tantasque corruptæ Eloquentiæ vices, sanctorum Patrum exemplo viri docti ac probi per hæc nostra tempora in Ecclesiam revocarunt: quos inter Hieronymus Mautinus Narniensis vulgo appellatus, & æque præstantissimus alter a Recineto dictus, duo Franciscanæ familiæ, quæ Cappuccinorum dicitur, clarissima lumina, apud Senatum Apostolicum sacras orationes olim habentes tam feliciter, tam luculenter sublimem divinamque Eloquentiam tractarunt, ut veterum oratorum in dicendo gloriam dictione æquaverint, argumento superaverint. Paulus vero Segnerus Societatis Jesu Presbyter, vir vere Apostolicus, cujus laudes nulla unquam ventura ætas conticescet, intermissam illam popularem, sed gravi cum majestate conjunctam dicendi vim veterum Patrum priscorumque oratorum, apud Italos præsertim sæculi vitio penitus extinctam, horum imitatione postliminio revocavit. Ipse enim divina providentia servatus ad hujus divinæ facultatis corruptelas tandem aliquando eliminandas, sacram popularem Eloquentiam pristinæ suæ dignitati restituit. Huic ergo divinæ Eloquentiæ magno statore ac vindici aras ponat universa oratorum sacrorum Respublica. siquidem ejus dictio pura, dilucida, venusta, non fucata, non affectata, rerum majestati in omnibus probe servit, ac  
omnium

omnium auribus miro artificio, sed prudenter latenti accommodata. Sententiæ vero graves, propriæ, loco, temporis aptatæ: non pueriles, non vulgares, non turgidæ, non putidis argutiolis illigatæ. Profunda argumentorum inventio, atque a natura profluens eorumdem tractatio; mirifica vero collocatio, ac dispositio scitissima, figurarum concinna varietate ita circumducta, ut gradatim semper crescat, & in angustum redigat auditorem. Stilus mafculus, semper sui similis, quamquam jucunda varietate distinctus: numerosus insuper quantum materia subjecta patitur. Noverat enim optime divinus orator quinam numerus ad res sacras faceret, quippe qui ab Augustino didicerat: *carvendum esse ne divinis, gravibusque sententiis dum additur numerus, pondus detrabatur*. Propterea non anxie nimis exquisitum verborum ordinem curat. *Minutum enim est*, ut Demetrius inquit, *quidquid exquisitum est*: & minuta sectari sacrum oratorem grandia loquentem minime decet. Sed ad Paulum Segnerum redeamus, ab ejus enim laudibus divelli minime possum. In explicandis rebus Theologicis, ut caute salebras vitat, ut summa facilitate decurrit vir doctus ac prudens; ut in similibus aptandis fecundissimi ingenii solertia vere triumphat; ut perpetuo regnat in ejus dictione veritatis amor, qui benevolos sibi, atque ad amplectendas virtutes, vitiaque fugienda, dociles reddit auditores! Præstat in summa fideliter quod in proæmio sacrarum orationum sibi, veluti legem religiose servandam, constituerat; Christianum scilicet atque utile semper proponit argumentum, utile vero & ad mores informandos factum, idque omnibus omnino artis oratoriæ, fan-

sanctorum Patrum, divinarumque Scripturarum præfidiis probat invictè. Hunc ego magistrum ab ineunta ætate perpetuo colere, ejusque sacras orationes exercitationis gratia sæpius memoriæ mandatas pro concione recitare consuevi. Hunc veluti singularem viæ ducem adolescentibus ad sacram Eloquentiam properantibus antepondere soleo; jis tamen, in quibus non tam altas egere radices perversæ quorundam opiniones. Etenim cum hujusmodi hominibus, pessima consuetudine obduratis operam & oleum me perdidisse magno animi mærore expertus sum. Nuperrime bilem mihi ab imis præcordiis excitavit sciolus quidam orator, cui nescio quid humilis ac pedestris Pauli Segneri stilus intolerabili errore sapiebat. Dicebat enim illum longe minus valere ingenio, atque Eloquentia, quam alii bene multi sacri oratores, quorum nomina pudet referre. Nesciebat enim imprudens floridum inter & turgidum, maculosum inter & nitidum sublimemque stilum distinguere. Quamobrem frustra in ejus aurem sæpius oggerere conatus sum auream Quintiliani sententiam: *quisque ingenio minus valet, hoc se magis attollere & dilatare conatur: & statura breves in digitos eriguntur: & plura infirmi minantur: nam & tumidos & corruptos & tinnulos, & quocumque alio cacozeliæ genere peccantes, certum habeo non virium, sed infirmitatis vitio laborare.* Hæc Fabius: quibus monitis nihilo minus ille melior factus abundantem sonantibus verbis, tumidisque sententiis Eloquentiam vitiosissimam, sublimem ac grandem appellabat. Faxit Deus, ut ad bonam mentem redeant, & meliora consilia capiant infani isti sacræ Eloquen-

quentiæ corruptores: ut exitialis hæc pestis ab viris ecclesiasticis tandem aliquando depellatur. Vos autem, qui ad veram sacræ Eloquentiæ laudem contenditis, Adollescentes optimi, agite nunc, quæso, referte animum, sitis ad veritatem, & considerate quæ studia a doctissimis majoribus nostris ad hanc rem sublimissimam, atque sanctissimam probe adipiscendam allata sunt. Hos sequi duces, horum intueri exempla diligenter oportet. Siquidem omnibus humaniorum literarum atque Eloquentiæ præceptis liberaliter imbuti, in sanctorum Patrum, ac celeberrimorum oratorum lectione optime versati, sacri oratoris officium, vobis assignatum a Deo, egregie sustinebitis. Principes bonarum artium Scriptores & doctores sæpissime legite & pervolute. Horum imitatione, si quid sempiternis mandare monumentis exoptatis, stilum optimum scribendi magistrum longa consuetudine subactum sæpe vertite, ut nil nisi lima politum, atque elaboratum industria hominum memoriæ tradatis: ne unquam laboris impatientes cruda atque indigesta, quæ ad exiguum tempus durant, in medium proferatis; succum enim non habent diuturnum quæ nimis celeriter maturescunt.

Quæ cum ita sint, quis non videt, Auditores, qualis, quantusque sit veræ Eloquentiæ usus in rebus sacris pro dignitate tractandis ac quanta in omnibus sacris disciplinis humaniorum literarum, & Eloquentiæ necessitas? siue enim aliena interpretari ac commentari velint Theologi, siue adversus hæreses aciem instruere, siue scholastico in pulvere adolescentes, quasi in palæstra exercere, siue res in Ecclesia gestas aut ab aliis scriptas,  
inve-

investigare, aut ipsi scribere cogitent; sive demum pro facris nostris dicere, atque homines a vitiis abducere, ad virtutes vero perducere satagunt, humaniorum literarum atque Eloquentiæ subsidiis se indigere, plane sentiunt, vel qui a consuetudine sensus communis omnino non abhorrent.

Quare muneris nostri partes eas esse video, Auditores, quum mihi, Sanctissimi Domini Nostri CLEMENTIS Undecimi Pontificis maximi beneficentia humaniores literas ex hac summa Romanæ Eloquentiæ arce, docendi provincia demandata sit; ut nimirum adolescentes ingenuos, illos præsertim, qui ad sacra studia se potissimum conferunt, veræ, solidæque Eloquentiæ præceptis erudiam. Eo igitur tota quanta erit nostra collineet industria, ut veterum eloquentissimorum virorum & exempla & præcepta diligenter enodata planius exponam: quorum institutis & imitatione prisca illa copiosa, sublimis, magnifica, ac sanctissima in rebus sacris pertractandis Eloquentia reviviscat.

Quæ si ex animi sententia succedent & magno munere Auditores meos donaverim, & meritas quantum potero, Clementissimo ac benefico Patri grates retulerim: non enim alia suppetit, maximo beneficio respondens gratia, quam optimus ejusdem beneficii usus, eo potissimum tendens, quo illud benefici Principis animus destinavit.

Utinam, quod a Deo Optimo Maximo diu precati sumus, horum temporum acerbitas tandem aliquando finem inveniat, ut initium requiescendi, & animum ad præclara bonarum artium studia referendi nobis concessum

65

sum esse sentiamus. Utinam flamma hæc pertinacissimi atque atrocissimi belli ex multis conflata ita restinguatur aliquando, ut nulla unquam scintilla compareat. Utinam post tot malorum, quæ nos undique perturbant calamitosissimam tempestatem, optatæ tranquillitatis aliquando illucescat dies! Utinam placidissima, sempiternaque Pax Christianæ Reipublicæ clavum teneat aliquando. Tunc profecto summus Ecclesiæ Pastor CLEMENS Beatissimus, quem Deus omnipotens diu servet incolumem, uberiora dabit facundia illa sua singulari ac pene divina sacræ Eloquentiæ documenta. Tunc magnificus Princeps literarum ac litterarum amantissimus largiori manu dona sua in artium præstantissimarum sinum luculenter effundet. Tunc denique Albani fidei beneficio bonarum artium studia ad summam Eloquentiæ gloriam reflorescent.

**F I N I S .**

2

2. 2. 1972

0057 5937





27. 192



22. 174.





